



ル 5
3285
7



凡5
3285
7

重刊宜興縣舊志卷之八

人物志

治績

古人學為有用致身青雲非曰顯榮而已蓋將於國計
民生實有建豎庶乎不負所學焉上而樞輔屏藩下而
一州一邑稱乃職盡乃心布德宣猷澤被當世皆不朽
盛業也夫運際昌隆從容展布其矢懷精白要與忠義
激發者異地而同歸口碑尸祝傳誦無窮孰非邦家之
光歟錄治績

漢

蔣堪輿字竺圖漢建和中仕為徐州刺史潔已奉公去浮

重刊宜興縣志

卷八

治績

昭和十八年
八月十八日
購求

重刊宜興縣志

費省繁苛百姓安之郡庭中有古栢枯死復生咸以為善

政所感 參見陵
人品記

唐

許緒景先之曾祖也武德時以佐命功歷左散騎常侍封

眞定公 本唐
書

蔣將明父瓌開元中宏文館學士天寶末將明辟河中使

府安祿山反以善謀畫佐其帥全并潞等州後兩京陷被

拘佯狂以免號王巨引致幕府歷侍御史擢左司郎中國

子司業集賢殿學士諡曰愨子又別有傳 節唐
書

宋 氏宜典線書志卷之八

蔣昂字希遠堂之弟康定初任蒲州司法參軍為政不忍

杖罰百姓號曰仁主相約有犯法者眾斥之訖二載不杖

一人 本毘陵
人品記

蔣之奇字穎叔登嘉祐二年進士中春秋三傳科又舉賢

良方正試六論英宗覽而善之擢監察御史神宗立轉殿

中侍御史上謹始五事一曰進忠賢二曰退奸邪三曰納

諫諍四曰遠近習五曰閑女謁凡數百言遷淮東轉運副

使歲惡民流募修水利以食流者如揚之天長三十六陂

宿之臨渙橫斜三溝尤其大也用工至百萬溉田九千頃

活民數萬移陝西副使經賦入以給用度比其去庫緡八

十餘萬邊粟皆支二年擢江淮荆浙發運副使元豐六年漕粟至京比常歲溢六百二十萬石又請鑿龜山左肘至洪澤爲新河以避淮險自是無覆舟之患詔增二秩加直龍圖閣陞發運使凡六年其所經度皆爲一司故事元祐初進集賢殿修撰知廣州妖人岑深善幻聚黨數千人謀取新興略番禺羣不逞蜂起其勢張甚之奇遣鈐轄楊從先討平之以功加寶文閣待制南海饒實貨吏多貪聲之奇取前世牧守有清節者吳隱之宋璟李勉輩建十賢堂以祀吏習不變徙河北都轉運使知瀛州遼使耶律迪道死所過郡守皆再拜致祭之奇獨奠而不拜曰天子方伯

奈何屈膝耶入爲戶部侍郎未幾復出知熙州夏人論和請畫封境揣其非誠心務守備謹斥候終之奇任夏人不敵犯塞紹聖中改知開封府進龍圖閣直學士兼侍讀元符末鄒浩以言事得罪之奇折簡別之責守汝州閱月徙慶州徽宗立拜同知樞密院明年知院事沅州蠻擾邊之奇遣將討平之崇甯元年除觀文殿學士知杭州以棄河湟事奪職免歸提舉靈仙觀三年卒後錄其嘗陳紹述之言盡復官職贈魏國公諡文忠真西山祠堂記云國朝若安樂蔣公儒術爲世所宗雖金陵猶推尊之何況其他又嘗置義田以贍族今其地曰南莊許有穀詩云功成身退

欲投閒穎叔湖南舊買田自是耕雲釣溪月幾家分粟共
 炊煙所著有尚書集解十四卷孟子解六卷逸史二十卷
 廣州十賢贊一卷芻言五十篇厄言集五卷老子解二卷
 老子繫辭解二卷別集九卷北扉集九卷西樞集四卷荆
 溪前後集八十九卷參節 宋史
 蔣之翰字文叔之奇同祖弟熙甯中以薦擢簽書鎮東軍
 節度判官案無留牘呂惠卿帥鄜延兩辟幕府辭不赴後
 選知登州陞辭神宗顧問久敷奏詳明甚稱上意明日語
 宰相曰蔣之翰有風力可使一道詎止郡守耶尋除提點
 京西北路公事劇賊王冲往來商鄧閒之翰計擒之哲宗

親政命攝吏部以疾乞補外充荆湖北路都鈐轄肅清諸
 弊民間以竹為屋屢遭回祿之翰莅任後無火災人以為

善政所感

節蔣譜魏公之奇墓誌

蔣靜字叔明元豐二年進士授安仁令俗好巫疫癘流行
 病者甯死不服藥靜悉論巫罪聚其所事淫像得三百軀
 毀而投諸江知陳留縣與屯將不協罷去徽宗初立擢職
 方員外郎明年遷國子司業帝幸太學命講書無逸篇賜
 服金紫進祭酒為中書舍人以顯謨閣待制知壽州徙江
 甯府茅山道士劉混康以技進賜號先生其徒倚為奸奪
 民葦場強市廬舍詞訟至府吏觀望不敢治靜悉抵於法

徙睦州移病提舉洞霄宮越九年召為大司成出知洪州復告歸加直學士卒年七十一贈通議大夫

節宋史參徐階鳳舊志

虞大熙皇祐元年進士元豐閒陳襄在經筵神宗訪人才之可用者襄舉司馬光韓維等三十二人以對大熙與焉

後以治行考最累遷至侍講

參咸淳毘陵志宋史陳襄傳

吳懋字禹功第進士調當塗縣主簿歲饑官出粟平糶糴者擾亂相蹂踐懋命布灰於地令循行以進右輸金左受粟人無譁者秋雨決圩堤晨夕督治民賴以濟移宿松政尚寬簡二帝北狩金人立張邦昌懋不屈棄官歸高宗即位召復故官除司農卿不拜擢知明州改吉州皆有政聲

節毘陵人品記

蔣億字仲永淳熙六年知信州鉛山縣始至即改建學校朱子為作學記稱其材高志遠平居抵掌論當世事滾滾不窮蓋嘗有意答兵萬里為國家立非常之功者其辦一邑固當有餘力

參節朱文公集

楊得安洪武十九年貢由國子生擢南和知縣永樂閒遷嘉興知府為政和易與物無競寮案以下咸推服之歷官

都察院僉都御史

參唐鶴徵府志王升舊志

杜欽字葵堂永樂二年進士由庶吉士授工科給事中七

年偕右副都御史虞謙巡視淮鳳水災奏免災傷田租出
官錢贖民所鬻子女尋遷太僕寺丞奉命督運軍餉道卒

參明史虞謙傳王志

徐鑑字子明永樂間由舉人任刑部主事嘗與夏原吉同
諫成祖北征繫獄卒以忠亮悟帝意遷戶部郎中宣宗登
極知鑑忠讜有才力惟時瓊州遠隔海南雜蠻難靖特賜
朝旨委鑑往治莅任後廉平仁愛瓊人格心向化視若父
母焉卒於官當道疏其績乃命立祠於瓊歲時致祭以孫
溥貴累贈少傅兼太子太傅柱國戶部尚書武英殿大學
士著有續列卿表十卷 參徐志

陳全字克完宣德九年貢任袁州府推官以廉平稱擢監
察御史三領敕印巡河清戎所至兵民感頌遷湖廣僉憲

致仕 節王志

尹弼字廷佐性醇謹不染俗習正統三年舉人以國子生
授吏部文選司主事陞員外郎時亳村東黃土橋南至邵
大橋地形高阜常苦旱饑弼疏請開濬引西溪洋蕩水北
注便民灌溉 參徐志

沈暉字時暘天順四年進士由南京工部主事歷遷都察
院右副都御史巡撫鄖陽時七府諸司皆創建吏緣為奸
地多曠土暉至黜賊吏令民無田者開墾荒野復其租三

年得熟田數千頃贖鄖陽城十二里民不知疲以鄖人飲
 於江多瘳疾命鑿十井於城中且造浮橋通樊城免往來
 風濤之患取均州太和宮香銀之半糶穀備賑後遂遵行
 之改巡撫湖廣奏定各藩府歲祿驗丁糧多寡定徭役輕
 重長沙武岳諸郡多逋負奏宜命官檢實詔以屬暉乃蠲
 民逋五十餘萬遷南京工部右侍郎以釐積弊為羣小讒
 毀上疏乞休卒於家暉楷書得顏真卿筆意詩有魏晉風
 所著有豫軒集好學至老不倦嘗謂楊龜山集無善本刻
 而序之復蜀山東坡書院捐貲給膳陶淑後進

參節吳仕
沈豫軒行

萬盛字巽夫天順六年貢任九江府推官以公廉自誓嘗
 辨釋冤囚十餘人囚家感而祠祀之年未七十乞休與鄉
 達邵賢輩結耆英會禮讓相敦年八十三卒

胡連字公器由成化十三年舉人任新城知縣遷福甯州
 知州改知歸州所至以循吏稱居鄉嘗建議革淫祠復岳
 武穆衛將軍廟增祀吳師古邵材錢卽於鄉賢

以上參
王志

張盛字克謙由進士授工部主事佐理河道有功累陞山
 東參政以事左遷福建鹽運司同知時年老或勸其稍營
 歸計輒面斥之未幾謝病免歸舊屋數楹蔽不可居門人
 邵賢等為醵金改築焉

參徐
志

李雲字時望成化十一年進士授戶部主事改禮部時晉
邸息羊病民雲奏革之宏治二年撒馬兒罕進獅子鸚鵡
違例雲復偕禮部耿裕等疏請卻之都民頌之有郤獅詔
旨頒天下萬國臣民動地歡之句累遷至福建右布政致
仕優游林下二十餘年飲食衣裘泊如也平生不治產業
有田三頃而已

參唐鶴徵府志明
史撒馬兒罕傳

陸廣字士宏宏治三年進士授戶部主事監太倉出納雖
竹木葦秸無敢奸者朝廷賜藩邸田多侵民疆詔廣往覆
其界凡屬民田皆正之一無所阿出知南康府致仕
杭濟字世卿父倫工詩尤善行楷書濟自幼穎悟十歲能

詩宏治壬子癸丑聯雋授吏部稽勳司遷考功員外郎考
覈臧否一時稱明暇則與同寮王守仁秦金輩爲五經會
弟淮亦與焉以親老歸省鄉人有以千金求脫重辟者拒
不受遷副使督福建學政尋丁外艱時年六十有一不以
衰憊廢禮起補河南左參政分守南陽南陽宗室以讒欲
置人於死濟反覆婉爭乃得免遷福建右布政使輕徭簡
賦有賂市舶鎮守議造海船者濟獨抗議極言通賈之害
事遂寢正德丁丑以老乞休解組後日與諸弟卽席聯句
腸詠湖山閒怡怡如也爲詩文俊逸冲澹尤精楷書辛卯
年八十仲弟淮亦年七十致仕懋德重位同躋耄耄鄉里

傳為盛事壽至八十有三無疾而逝所著有澤西文集聯句稿行世

杭淮字東卿濟之弟宏治十二年進士授刑部主事嘗錄囚淮揚數郡纔戮一人出為浙江僉事楮戶輸歲課循例有饋金卻不受捐俸葺林和靖墓重修放鶴亭督學雲南沐英世祀於滇請陪祭不許又表吳雲忠節陞湖南廉使屬令有婪贓者巡按意欲原之淮竟按如法轉河南左藩有羨餘二萬緡淮命歸之帑毫釐不染丙戌拜右副都御史丁亥總督南京糧儲會與當道者不合疏勒回籍聽用科道交章論薦謂淮不當投閒經銓部會推者六終以疾

辭淮天性孝友重宗祔族人無遠邇貧者月給之粟平生

無他嗜好獨愛聚書解組後日與四弟濶濶洵湊怡遊觴

咏於泉石間卒年七十有七所著有雙溪集已上參徐志

芮京號涪山宏治十七年舉人任定陶知縣下車即捕邑

豪劉金正其罪境內肅然治尚廉慎鞫獄多平反歲饑賑

貧民全活萬眾致政家居敝衣蔬食終其身節曹邦輔墓志

胡忠字企周正德三年進士由戶部主事歷廣西參政劇

賊王鏐土官岑猛負固戕殺守臣忠奉總制檄討之七日

誅鏐猛遂遁匿以功擢副都御史撫延綏致仕為人不苟

邊幅家居儉素如寒士參江南通志節徐志

湯建衡字平仲初名鄞嘉靖十年舉人官江西新城知縣有流賊猝至守備王址死焉士民奔竄衡整衣冠坐堂上決計死殉賊疑有備引去郡守鄧素憾址駕言址不死而遁弔其棺將毀之衡力持不發址卒以死節聞乃修垣築塹教民戰守創為千里勝火鉤鎗等器次年賊薄城射卻之賊凡三掠境兩薄城衡令附郭民入城為堅壁躬親臨陣屢戰屢捷闕賊破建甯後偵知新城無援突來攻衡且守且戰賊不得利乃宵遁先是賊將至有議請援兵者衡不許賊退問其故曰請而不至民將解體至而不用命徒增民害耳賊平遂乞歸新城人為歌詩一冊紀其功曰制

勝安民集衡天性孝友親亡後每祭必號泣兄郭卒撫二孤如己子從弟鄮流滯他鄉覓之歸為再置家室族弟儒早世遺妻王氏守貞衡為助貲旌表所著有懷南賢已浙

東紀聞燕臺感遇黎川歸田雲涇諸集參節舊志萬士和履庵文集江

南通志邵天和字節夫嚴州知府珪子宏治十八年進士正德初

由庶吉士授吏科給事中劉瑾竊柄屢差勘問外官又差查盤河東鹽課銜其不納賄因事謫判曹州旋誣其受平陽府餽矯旨提問革職瑾誅事白進尙寶司丞累遷雲南副使所至以清白稱卒於官同寮發其囊銀三錢而已王參

曹三暘字子泰嘉靖二十三年進士授大理寺評事精於律獄訟出其手情法相麗老吏弗如遷寺正出知漳州府改補濟南鄰郡有富人子罪疑按使者引嫌不敢決移獄三暘三暘直之曰死人以博廉名太守不為也歲大饑發粟煮糜他郡多來就食全活無算歷進副都御史巡撫雲南奏減貢金額又議清軍伍築邊城凡十餘疏皆報可進南京刑部右侍郎時新鄭嫌其不附已緣考績日賄違新例罷官後以薦起故官改戶部侍郎總督糧儲陞南京工部尚書以病告歸卒贈太子少保子司勳孫應秋並舉進

士司勳歷官福建布政使應秋歷官河南兵備道峭直精敏不減家風曹氏世居琅玕山往來城邑常苦西溪之險

三暘囑水利御史林應訓檄縣開閘溪河凡二十里費累

萬當時苦其役然至今便之

參節王錫爵曹雲山墓志 江南通志

陳儒字懋學先世交趾人以土官百戶從征黎有功賜籍

錦衣衛儒徙居宜興遂占籍焉登嘉靖二年進士性嚴毅

有治才累官南京刑戶二部侍郎轉總漕右都御史所至

奉法風裁凜然寮屬皆悚息不敢怠平生惡封殖既謝祿

益貧臨終有入內寢問疾者見其敝帷疎席有寒士風卒

贈刑部尚書

參徐志

楊準字汝平嘉靖三十二年進士由戶部主事歷官郎中
出爲衢州知府衢故產礦盜採者羣聚前守皆姑息幸無
事準單車往諭以禍福使解散不聽準乘其懈勦除之廣
賊千餘流劫經常山使其徒詐詣準稱報効準閱武揚兵
以折之賊沮退乃量給口糧遣出境衢有徐偃王廟眾捨
祀田累千百畝徐姓世蠶食之爭訟無已準論偃王僭號
不宜祀請於督學移其田入學校去任日衢人立祠祀之
進河南兵備副使再遷福建左參政濱海民疲於倭寇逃
亡殆盡準招徠遺黎選士練兵爲備禦計寇至檄守備某
乘其未登岸擊卻之巡撫上其事賜金幣會考察爲言者

所誣當調簡遂告歸準少受學兩兄卓阜事之甚恭一門
以孝友稱阜字汝成嘉靖十年舉人授廣濟縣知縣世宗
賞海內縣令無宿逋者八人阜居一焉遷饒州府通判以

疾歸

參節萬士和履
庵文集 王志

曹景暘字子升與從兄三暘共鉛槧已從荆川先生遊學
業益粹由嘉靖三十四年舉人任金州知州當兩陝衝
民困供億景暘至首裁省之洵陽徭歲訟不均監司檄景
暘往覈眾帖然時陝盜劉才聚數萬眾剽掠紫陽石泉
平利諸險官軍莫敢近撫按責以征勦景暘布示恩信勸
之投誠賊悉率所部降民歌之曰使君不掘牛山谷尺一

夜飛欃槍伏金州太平兩陝熟遷西安府同知以病告歸
初金州患漢水每霖雨漲溢城市水輒丈餘景暘禱於山
川為坊禦之終其任不為災比去金州水陷州人又歌曰
曹侯去何時還失我趙臺山趙臺山者相傳梁時避水處
也子司宰隆慶元年舉人歷官南京刑部郎中著有中議
三卷孫師稷由進士為給事中有銘石疏稿十四篇

東岡墓志 唐鶴徵 府志 王徐舊志

周涪字還之原名之禧嘉靖三十四年舉人居兵部尚書
方公幕府有暮夜饋之金斥不受張居正欲羅致門下謝
弗見後官太康知縣為誓言六條署廳事朔望命吏高聲

誦之又徙水戶不使雜民居禁吏役不得與士人齒河決
汴溺者萬計涪督工疏壅閼泄之下流太康不被害暮年
以忤上官罷縣民涕泣送之及孫正儒登第授給事中戒
之曰受此殊恩當思何以圖報參節 徐志乘風對數浪
俞頤吉字履貞由舉人授江華知縣縣故楚徼有劇賊鄧
金虎陰結猺夷為亂頤吉密募鄉勇設方略擒之考最遷
開封府同知本徐 志
潘松字惟喬少孤事母三十年未嘗失其懽心有姊嫠而
貧力扶持之至鬻田以贍由舉人授任邱縣教諭以身立
教生徒貧而力學則捐俸館穀之故任士奮興比隆於舊

擢保定新城令寬簡得民新城衝劇巨瑞巢焉松雅不便承迎遂乞改教得福州府弟子員至二千人率厲鼓舞視任邱有加當道嘉其嚴正咸尊禮之公移祇以手書相授稱先生而不名河閒八閩稱師範者必曰後齋先生云

參徐志

俞霑字時澤萬曆五年進士授台州府推官台民素刁悍憚其廉明奸宄屏息地濱海夷人每乘風擾邊境霑嚴備戰守具台人獲安陞銓曹權要囑用私人弗聽出爲大名兵備副使時劉東陽反甯夏總憲檄諸道選兵以待霑以兵易聚難散募丁壯願赴者千人隨營操習鄰境效之兵

具而人不擾旋以母老乞休後以薦起山東江西副使皆不赴所著有四子解子士章字汝成萬曆十一年進士授義烏令報最擢儀曹轉主客郎中上疏勸建儲不報督楚學所拔皆佳士改福建參政吏治肅清榷使議稅逾常額士章抗不從璫知不可撓一遵舊制歲饑賑卹災黎無失所又捐俸買地瘞骸千萬閩人德之

參節俞譜

路雲龍字伯際忠信沈潛爲萬文恭周訥溪高弟萬曆庚辰進士歷官蘄州建昌永州俱祀名宦擢思石副使值播酋新破龍泉雲龍力守孤城瘞其印以死自誓板角之役拔幟先登破雄關擒楊應龍斬之大帥劉公綖憤民久附

賊欲屠之雲龍力持不可民得全事甫平大水壞城舍賑

饑繕堞靖民安疆晉江西參政卒于官著有毛詩講義牧

政譯編思石十議風木齋集祀鄉賢參吳達可路漢畦墓誌

路文範字先卿雲龍子天啟甲子崇禎戊辰與子進鄉會

同登以戶曹督浙兌艘無留行視權九江有稅無罰著為

令分巡灃陽十八洞蠻獠為暴文範擒其首八大王而散

其黨民建生祠祀焉遷浙江副使告歸祀鄉賢參蔣允儀行狀

路進字修期與父文範鄉會同登初守金華多善政民立

石頌德名甘棠碑遷杭嘉湖道擒太湖巨盜十龍一隻虎

等時流寇方熾人心惶懼進置軍器訓鄉勇嚴保甲練水

師著守湖輯要治茗八法頒郡縣民心始安晉督七省漕

儲巡視河道兼山東左布政明亡遂隱居不出參英大勳路遜修傳

潘守正字子貞萬曆十七年進士授廣信府推官治獄多

所平反擢戶部主事督運通州會有從中擠之者左遷贛

令邑衝且瘠守正以廉靜治之催科聽訟視郵造士皆有

法歷官南京工部虞衡司郎中祀廣信府名宦參潘譜陳玉璠府志

儲昌祚字肩宇萬曆己丑進士令鄱陽浦城有政績兩邑

俱祀名宦歷重慶兵備僉事致仕歸初昌祚登賢書萬士

和語之曰足下青年榮薦前途未可涯也居官勿納人一

錢亦勿以一錢賄於人昌祚守其言終身時史孟麟張納

陸嘗講學東林昌祚謂人曰士大夫立身行己治官理家何者非學而聚徒標榜伐異黨同吾懼清流之禍復作耳弟顯祚字文曙萬曆四十四年進士授戶部主事監內官儲闈聚而譁縛其首一人杖之譁乃止天啟元年差理延甯糧儲延鎮缺餉至百二十餘萬勢幾內潰顯祚具疏痛陳便宜調劑軍心以安遷襄陽知府有貴戚恣橫裁以法不少貸值魏忠賢用事前所杖闈其黨也遂乞歸崇禎初起補下江道歷湖南按察使致仕著有歷朝史斷三十卷昌祚子懋端年九十六孫欣舉人曾孫善慶方慶皆進士元孫在文大文郁文雄文皆進士右文高文皆舉人文學

淵源爲邑首推云

參徐志節備欣在陸草堂文集

徐洪祚字式圍萬曆四十一年舉人崇禎五年授程鄉令劇賊張文彬何四仔等擁眾十萬據銅鼓嶂勢張甚洪祚討平之而原其脇從全活甚眾復爲善後計建議於海潮程平四縣閒設鎮禦寇度地計工不踰時而成遷荊州同知時缺知府聞流賊將至巡撫見洪祚名喜曰若可辦賊遂檄洪祚署印環甲乘城晷日不解帶者二十四晝夜會滇兵二千應調至苦無支餉洪祚曰兵不可無餉留甯能無餉返乎與其譁於道孰若駐此危城緩急可恃遂持議給餉藉以擊賊城賴以全後以年老乞休歸

徐懋曙字復生崇禎四年進士授部曹典試粵東有囑其
戚黃緣者懋曙曰吾三年前無科舉匍匐北雍惟恐弗及
今幸聯捷爲試官敢負初心乎固拒之旣試所得皆名士
改刺吉安地界閩楚四郊多壘懋曙悉力防禦吉賴以全
宗祿之諫也藩司將取吉正解改抵督漣懋曙念抵彼則
此負勢且復徵民堪之乎吾甯以一官謝吉耳挂冠之贖
數上而改抵之議遂寢郡多大族懋曙擊豪強絕請謁權
貴重足有按使至欲中傷之至九日公譙滕王閣問知府
爲官若何大司馬李邦華答云明如萬里無雲清乃一塵
不染按使頓爲改容比徙官吉父老走監司乞留者萬計

歷任黃州甯波太守所至多惠政鼎革後家居不仕著有

且樸齋詩稿其弟懋曉崇禎丙子舉人懋曙長子炳燕乙

卯舉人

參節
徐志

吳宗儀字象于由舉人授新河知縣舊有買馬之役額銀
侵扣民以重困宗儀力請上憲如數給之民遂樂充其役
邑有巨奸捕之久不獲一日宗儀謁軍門其人爲門官揚
揚不避宗儀叱擒之告巡撫立置於法邑近滹沱多水患
宗儀築堤捍之民獲安堵遷延安同知分司神木痛革舊
例歲省商軍銀數萬餘兩每修城垣例用潼關民夫多饑
寒病死者宗儀饑給以食寒給以衣病給以藥全活甚眾

神木故脂膏地宗儀莅任久清操益著遷福建鹽運司運同卒於官居常教子孫以孝弟為先嘗曰生子掇科第不如生子能孝弟著有逍遙堂小草醒世篇蒙士八箴勸民條約清裕堂文集行世

參節徐志陳玉璣府志

萬象新字與調萬歷二十五年舉於鄉司宣城鐸捐俸葺學宮課寒士麻一鳳等十人俱聯掇巍科徙山右和順知縣合里併甲薄賦輕徭邑有虎患象新為文祭禱城隍神三日患息調繁祔縣有援遼兵過境而譁帥不能馭象新單騎往諭之悉聽命考選卓異第一擬擢諫垣時魏瑞肆橫象新勇於請退稍遷南昌府同知時江西建魏瑞祠監

司將使象新督役乃告歸崇禎初起刑部員外進郎中命

推瑞案波累者盡釋之年六十乞休捐貲建宗祠置祭田

贍貧睦族人以此益賢之

參節徐志山西通志

萬德鵬字冲甫由萬歷二十八年舉人授同安教諭遷興甯知縣俗敝民偷地有斷腸草因睚眦輒取自殺以害人居奇者漁其貲產不盡不止德鵬嚴主使居奇之罪而斷腸草遂不生養老禮士禁暴勸農一變其俗嘗捐俸買學田以贍寒士又湖方橋水口渡皆往來孔道亦買田以備修葺丁內艱歸囊橐蕭然起復補連江知縣治如興甯陞平陽同知四載致政歸興甯士民德之立祠以祀

本徐志

蔣宏憲字成甫父士元字君弼由舉人歷官兗州府同知進運同以廉能著宏憲少時卽清介特立嘗曰聖人思狂狷吾不能爲狂願爲狷者萬曆十三年舉於鄉由吳江教諭遷戶部主事三十八年山西饑詔擇廉慎者往賑部臣以宏憲應時議撥清源粟而清源價亦湧貴宏憲請予折色民賴以濟差權河西稅甫至卽減額十之三捐沒入之例商民德之故事權使兼理剝運是年舟凍阻蚤夜調護且代償攤耗又以歲祲民多流亡所居權城嚙於水將盡地乃捐俸葺之以工代賑仍使病者日計口受粟於官至麥登場乃已差滿入京卒於旅次商民醵數百金爲殯子

允儀遵遺命悉卻之

參湯兆京蔣笠澤行狀陳玉璠府志

丁天毓字秀夫萬曆二十九年進士授金谿知縣縣有許灣稅土豪挾稅璫爲奸利天毓力請包稅撤役民立生祠祀之俗好訟動輒殺身陷人天毓嚴主使之罪俗稍稍變聽訟多令人自平罰鍰不足充積穀之數捐俸金佐之擢貴州道御史卒於京親故醵資殮之

李守俊字念劬萬曆二十九年進士任廣東高要知縣治最遷戶部主事差權九江未及期度無虧課卽放關通舶免其稅商人立生祠祀之天啟五年歷遷廣西布政時天下藩司皆爲逆璫建生祠守俊恥之不赴任御史田景新

劾之削奪聽勘崇禎改元補湖廣左布政卒于官櫬歸過
潯陽父老攜羊酒泣奠曰放關一事目中不復睹矣

參陳玉基

府志節
徐志

周鼎字在調萬曆四十一年進士授平陽府推官歷任至
總河侍郎以開泃河功進工部尚書先是侍郎李化龍大
開泃河避黃河之險後河決泃淤崇禎五年總河朱光祚
濬駱馬湖避河險名順濟河六年良城至徐塘淤爲平陸
漕運愆期奪光祚官劉榮嗣繼之八年駱馬湖淤阻榮嗣
開河徐宿引注黃水被劾得重罪鼎繼之乃專力於泃河
濬麥河支河築王母山前後壩勝陽山東堤馬蹄厓十字

河攔水壩挑良城閘抵徐塘口六千餘丈九年夏泃河復
通又修高家堰增築天妃閘次塞決口三百三十餘丈次
築遙縷二堤五百餘里又以邳州三面距河屢被水災特
請於朝改河行羊山外邳城以安凡興四大役不忙迫不
勞擾而厥功告成說者謂近自潘季馴楊一魁後治河未
有如鼎者也告歸後卒以漕舟阻淺被逮科臣疊奏其有
修泃功乃免戊寅冬京師告急鼎奉命移鎮臨清觀軍太
監高起潛縱兵淫掠鼎及其未至喻以大義將士皆受約
束又策其必過濟甯飛檄禁諭兩境帖然以年老罷歸卒
年八十有九

節明史河渠
志 參徐志

毛之儁字伯元萬曆三十七年舉人授宿松縣教諭諸生執經問難講論不倦宗禎乙亥流寇薄皖城或勸之去不聽賊至斫其頸仆地流血赭體意其死舍之去踰時而甦後遷北雍學正轉南戶部主事出爲臨江守下車月餘奸胥讖吏皆屏息無敢下上其手修城浚池練兵礪器以備流寇四封獲安堵焉尋推荆南節使決計退諸父老卧轍不能留幅巾歸里布衣蔬食者數十年足跡不入城市卒年九十三所著有慶餘集

參節徐志

毛士龍字伯高萬曆四十一年進士授杭州推官才稱其職甚有丰采他郡之訟於兩臺者亦求發杭州毛青天擢

刑科給事中天啟元年正月疏論三案力言孫慎行陸夢龍何士晉楊漣等有功社稷魏俊輩醜正害直罪當誅帝是之李選侍之移宮也其內豎劉朝田詔等五人以盜賞下刑部獄尙書黃克纘庇之數稱其寃帝不從論死王安罷魏進忠用事朝等進重賂卽傳旨貸死旨下刑科士龍抄參者三克纘請付之熱審進忠不從傳旨立釋士龍憤劾克纘阿旨讖法且數朝等罪甚悉進忠銜士龍刺骨九月士龍劾順天府丞邵輔忠奸貪輔忠大懼朝等因誘以超擢令攻士龍輔忠遂訐士龍官杭州時盜庫納妓進忠從中下其疏削士龍籍輔忠落職閑住進忠後易名忠賢

恨士龍未已四年令其私人張訥劾之再命削籍明年三月入之汪文言獄詞謂納李三才賄三千謀起南京吏部下撫按提訊追賊遣戍平陽衛已而御史劉徽復劾士龍納訪犯賄萬金下法司逮治士龍知忠賢必殺已夜中踰牆遁其妾不知謂有司殺之被髮號泣於道有司無如之何莊烈帝嗣位忠賢伏誅朝臣為稱冤帝赦其罪士龍始詣闕謝恩帝憐之命復官致仕十四年里人周延儒再相始起漕儲副使督蘇松諸郡糧仕至左僉都御史謝病歸國變後卒著有毛氏爰書節明史王元成傳

吳正己字輿則嘗與文震孟張納陞諸君子講學東林萬

歷四十三年舉人為蒙城教諭陞國子學錄大司成命主講席園橋聽者千百人轉戶曹督餉長涿閉出入矢石軍賴以濟尋管太倉時其收放解戶便之餘米三千五百石豆二百五十石封貯於倉或請上聞不可曰市功作俑非君子之道大司農程公間之嘆曰所謂有金如粟不以入懷者乎管崇文門稅刷蠹寬商一介不染商民為立碑署前尋管明智草場又值軍興買運以補不足不傷民不病兵遷湖廣鄖襄兵備乞歸年七十一卒著有開美堂文集

行世參徐志

徐紹沆字貞父萬歷四十四年進士授戶部主事屢遷郎

中督通倉糧積弊肅清廉惠大著遷靖邊兵道親歷風霜
與士卒同甘苦翟中丞稱之以爲此邊帥材也轉冀南管
河道責甚鉅或慮之紹沆曰禍福命也奚足慮嚴核工程
防蠹穴治行卓然仕終粵東左布政

參節
徐志

蔣觀字拱北萬曆四十七年進士授趙州知州案無留牘
疑獄平反者尤多壬戌調河南信陽州賦稅積逋豪強飛
詭欺隱多膏腴不賦覲力爲剔理宿弊盡除課最擢兵部
車駕司員外條畫九邊甚悉度機宜覈功罪數千里外瞭
若指掌丙寅進郎中出爲大同兵備僉憲尋進副使周巡
冀北徧歷山川險要親臨行陣日提將領訓之時西警方

殷羽書旁午覲晝夜嚴哨防禦寇不敢犯冀人安堵辛未
除河南清軍驛傳鹽法道設教條明厲禁剔奸摘伏蠹豪
皆震懼風俗爲清以積勞致疾卒於官未竟其用大僚皆
痛惜之著有空明軒宦稿

參蔣允儀澹
香園文集

吳鳴虞字兩階天啟二年進士授戶部主事晉郎中時有
託名掃積以邀寵者鳴虞恐爲朝廷歛怨力除其弊一時
羣瑞側目矯旨削籍崇禎元年特擢文選司郎中綜核選
法慎重名器有鎮羣鴛查冒濫諸疏上嘉之召對平臺痛
陳諸臣輕兵政爭門蔭不能公爾忘私大失朝貴旨三疏
乞休乃予告歸

本徐
志

蔣如鼎字國器以天啟辛酉序貢任浙江永康縣訓導多
 教澤署武義義烏縣篆皆有政聲授分水縣令弭盜安民
 振興文教期望謁學必進諸生講解經義分邑士六十餘
 年無獲雋者至是濮有宏陳素抱等聯登甲乙科秦檜妻
 父王縉濫祀鄉賢命黜其主士論快之民有典妻錮婢惡
 習永為嚴禁甲戌告歸分民泣送行李蕭然兩賓鄉飲年
 逾古稀手不釋卷燕居必正襟危坐人咸稱為古君子云

參鄉評備
考 徐志

湯啟煇字宜仲避儲諱改啟祥天啟二年會試第五人謁
 選乞就南曹迎養老母嘗用白香山但休爭要路不必入

深山句粘於壁人知其識趣之高遷車駕司郎中掌船政
 時璫燄甚熾索進貢船踰額煇執舊例拒不多與逆璫建
 祠落成煇恥拜謁先期乞假歸崇禎初補原官出為太原
 知府派辦鉛礦二十萬勛煇賣現鈔躬馳鎮集及山中與
 商民貿易鉛礦大集三月告竣流寇渡河守圍措餉百憂
 交集加以簿書鞅掌致疾竟不起易簣時宦橐蕭然寮屬
 捐卹乃得含殮合郡士民具生為廉吏死作明神之詞呈
 請學使允祀名宦所著有石城草行世

參節
徐志

顧一讓天啟二年進士授清豐知縣居官正大寬平廉介
 有節羣吏憚之未一載以疾卒於官今祀清豐名宦

參清
豐邑

吳士貞字元滋參政仕之孫也九歲喪父哀泣過成人天
啟五年進士自念兩世幼孤祖母潘母沈冰霜苦節具疏
陳情旌表一門雙節授上虞知縣虞俗無賴輕死多服鹽
滴自斃陷人士貞出教以鹽滴致死者不受牒并反坐其
風遂絕豪家欺奪平民每威劫立契突率僮客掠其室謂
之生燒士貞立寅之法大姓屏息民間歌曰謂爾亡命毋
自苦吳公不聽食鹽滴謂爾僮客毋太豪於今我得免生
燒崇禎元年秋颶潰海塘捐俸增築民稱吳公堤攝餘姚
彖會大旱虔禱得雨民又有惠甘霖勝珠玉之謠擢禮科

給事中上靖獻先資疏又疏言適年文體日壞士習日靡
宜加釐飭皆獲俞旨卒於官橐不滿數金先是上虞有生
祠卒之日像忽變色後聞訃民皆異之羣為流涕設祭著
有冰心齋集三草齋詩 參陳玉璠府志 節徐志
任允瀄字環生崇禎七年以舉人授望江教諭權縣事流
賊突至眾倉皇欲奔允瀄集士民於明倫堂諭以大義誓
與城俱存亡眾皆奮於是登城死守賊屯西門外龍家塘
夜過半開門率數百人衝出火銃齊發城上下呼聲震地
賊賊懼棄營走墜谿崖死者無算允瀄曰賊失利去必復
來以賊所遺甲冑器械分給丁壯屏溪水入龍家塘布竹

木刺水底築堤起弔橋堅壁清野以待無何賊大至渡水決堤馬足著刺驚倒多墜水死允瀄豫伏人堤邊馬奔堤上悉驅入城賊悉眾百計攻城西北月餘不克饑疲遁去無何又羸糧至爲久攻計值除夕允瀄使壯士百餘人潛抵賊營放火銃大呼焚其積聚城上爆竹聲如沸賊驚潰怒甚更運糧攻城東北允瀄於元夕令童子登城鳴鉦鼓爲燈戲密遣壯士百餘人復潛至賊營如前法奮呼賊復大驚亂會史可法引兵來援允瀄率眾逐北與可法犄角截殺數萬賊無脫者事聞授車駕司主事桐城大學士何如寵爲作三保危城去思碑記後出爲夔州知府值明亡

未赴任家居抑鬱而卒

節潘天成鐵廬集參徐志

吳正心字誠先正己弟崇禎三年舉人授雲南富民知縣擁多民少懵不知學泮宮設城外傾圮已極捐俸移建城中與士子講學課藝給以薪米三年張友鹿始舉賢書自制科數百年來未有也邑士感悅立碑記之士官倡亂邑人震驚正心單騎入其營諭以禍福寇懾服而退士庶復立碑記其事官至戶部郎中著有滇中詩集十卷

參節徐志

戴英字育之崇禎癸酉甲戌聯雋授戶部主事旋筦銀庫出入犁然命督儲薊鎮鎮兵素悍英善約束帖然無譁擢戶科給事中督漕淮濟時軍事孔亟輸輓維艱英往來凡

四閱月而軍儲四百萬次第登庾後改兵垣時閣臣楊武
 陵督師闕外逗留不前荆湘晉豫間患賊尤患兵英抗疏
 論之盡發其蒙蔽狀疏留中二十餘日天子密遣內臣馳
 至軍中使自行回奏已奉俞旨一時有朝陽鳴鳳之稱尋
 持節冊封懷慶新昌兩藩中州以兵荒洊臻流離載道具
 疏請蠲賑天子允之旋拜表暴盧督師之寃劾甄司寇之
 奸皆言人所不敢言卒以剛直不容外轉關右憲副復中
 以他事罷歸鼎革後杜門卻軌惟與山僧訂方外交著有
 諫垣疏稿陶隱庵詩集子允夔崇禎十二年舉人庚辰明

通進士

參節龔鼎孳本傳徐志

吳洪昌字亦如崇禎七年進士授建德知縣清操自勵治
 民多惠政擢禮部儀制司主事以疾假歸建德之民立祠
 祀之參徐志夏尙綱字中美崇禎四年進士授戶部主事命巡德州倉
 儲盡除需索尅扣諸弊吏胥畏服擢居諫垣時京師戒嚴
 議浚城濠尙綱切諫謂擲百萬費於水涯孰若用之疆場
 且使塹濠可守則通德滄濟其為廣川巨浸何限而去年
 賊乃揚鞭飛渡禦寇在人不在險亦明矣疏入留中後以
 忤當道出為浙江金衢副使時白糧解省民戶被累往往
 破家尙綱聞省中米價與金衢相若請於撫按聽民赴省

採買民困由是得紓移鎮漳泉率義勇截殺流賊乘勝逐北會賊有援兵至攻城守者駭散城遂陷尙綱棄官歸道聞京師已陷悲憤不食數日卒其繼妻趙氏及女在京邸城破投井死其三媳唐氏自縊死

國朝

蔣永修字紀友順治四年進士授湖廣應山知縣民遭兵燹後戶口未復永修撫治勞來甚有恩鄰境賊起率百姓守禦有方賊不敢逼舉卓異擢刑科給事中敢言不避權貴時浙江提督田雄內多貴戚援疏爭州縣文移接見禮永修上章劾之極言 本朝定制文武不相統屬田雄何

人而敢妄議疏入 召見 內廷辨論無所屈

世祖曰蔣永修真諫官也轉戶科都給事中疏數十上皆關切治體已而外補以本籍錢糧註誤鑄級知貴州平越府清丈苗民虛稅爲地八千有奇擢湖廣提學副使葺學校舉名宦飭士習振文風楚人悅服陞陝西參政未任卒著有四垣疏稿曰懷堂集參田雄疏爲睿裁炳若日星禮儀頒布方始豈容輕議妄更以滋紛擾事竊惟域中無兩大天下定一尊故凡制度典章一經皇上裁定卽當海宇臣民共爲恪守孰敢妄置喙於其間哉臣辦事垣中見提督田雄文武並重一疏不禁愕然曰何藐王章而輕置疑議也我朝開創文武並用原無軒輊武臣專制一方威行閭外體貌固不可褻然州縣官品級雖卑皆承

命出宰為

皇上撫循黎庶錢糧詞訟皆有專責與提督衙門絕不相屬自古迄今文吏治民武臣治戎不令互相統攝原有深意若以品級論尊卑則春秋所云王人雖微序諸侯上豈嘗較品定儀耶聿稽唐末藩鎮擅權郡縣守令盡仰鼻息官方斥陟財賦出入悉歸掌握變擾延及五代宋太祖鑒前代弊始令州縣長吏親理民事不與武臣關涉故海內復見又安我

皇上酌古準今定為文武接見文移之禮於提鎮衙門既尊其體貌於州縣正官亦免其匍匐在提鎮不得握重兵而輕文墨在州縣亦不敢挾民社以傲元戎同心共濟各恭厥職真萬世不易之良規也豈意奉行未久而雄忽請更議觀其持論必欲易照會陵刺史卑視藩臬齊驅督撫方可自鳴得意者嗟乎何所見之謬也夫督撫兼任文武提鎮專職戎行責成既殊體統自別揆事較理則提鎮之行州縣自不得更照會州縣之見提督自不得再貶損此其彰明較著者也況既奉
容裁親定即為萬世章程何得妄有異議至雄疏內有直抒所見罔識違天等語更爾懟褻非人臣奏告之體當併請

旨嚴飭者也

周啟雋字立五起家寒微年十七始就學授經於外有室女夜奔峻拒之順治四年進士館選第一

世祖章皇帝眷注甚厚歲三遷至左庶子乙未分校禮闈忌者以門下士同姓為嫌喉臺臣劾之啟雋疏辨

上知其無他以陳言過激降級用再遷鴻臚少卿

聖祖即位鴻臚失請駕復降級在廷僉曰此事責在正卿辨必復啟雋曰是益正卿罪也解官歸杜門著書邑有大

利弊必侃侃爭之甲寅冬宜邑有添兵駐防之檄率先謁當事力言宜不需兵檄遂繳版荒逋糧邑令議分派里民

啟鶴力止之後巡撫慕天顏以石田上聞除其稅邑屢饑
啟鶴必倡率賑濟全活甚眾王家宰永吉嘗曰周子爲人
澹然若木故以澹木名其齋著有文集八卷詩四卷參節
徐志
儲曾字留日順治六年進士授永豐知縣明末永豐首亂
江西入 本朝餘風未殄曾擒賊首誅之散其黨招流亡
復業邑以大治初下車見軍人攫物於道執之少頃其黨
譟而來瞋目戟手自稱督鎮標官往袁州採辦軍需者出
文符一紙曾閱訖大怒曰豐去袁六百里而幕府牒在半
載前官則逃官兵則逃兵也并執付獄移文幕府果係奸
人買僞牒且論如律他邑聞其事諸奸斂戢絞犯甘旋獄

既具曾閱獄詞疑其冤覆鞫得實知爲仇人楊誠一所誣
誠一者邑中巨猾莫敢誰何曾釋甘旋以其罪罪誠一民
大快邑多奸豪其尤暴者曰徐七日聶某民罹其毒爭赴
縣哀懇曾悉召諸豪面質之立斃徐聶杖下餘人股慄在
任三年以負課去官士民攀送者以億計曾嘗葺恩江橋
既去豐人爲歌詩勒諸橋以志遺愛父遇伯愷悌君子也
曾筮仕誠曰甯得罪上官無得罪百姓曾拜受之不敢忘
歸里後杜門課子二子振掄皆成進士節儲欣在陸草堂
文集 參徐志
潘瀛選字仙客由進士授中書舍人順治甲午分校北闈
丁酉主試廣西皆稱得人遷兵部郎中出知河間府營兵

餉不給夜譁炮聲四震上下驚怖瀛選聞變卽披衣起命
參軍馳召其帥諸弁素服瀛選聞召卽至士卒皆披甲設
弓以從勢洶洶瀛選坐堂上諭之曰餉易易耳我可立辦
汝等胡蹈死地爲眾乃解去帑實無宿儲設法假貸邑中
富家巨室素知其廉悉助之質明而軍餉數萬以給撫軍
以下咸服其應變才以原籍錢糧呈誤降調甯波同知遷
青州分司卒於官

參徐志

周伯瑞字輯卿明工部尙書鼎長子以父蔭戶部主事居
官以廉慎著弟仲球季琬順治九年同登進士仲球授甯
波府推官甲午分校浙闈焚香告天所取皆寒士

周季琬字文夏選庶吉士十三年授監察御史時江南漕
政積弊爲民累巡按徐世楨前奏每兌漕糧百石準加米
五石銀五兩巡按孔允樾又奏請官收官兌皆未遵行季
琬具疏力言利弊漕政爲之一清又有諫止裁官慎選督
臣疏又以部覆勘荒非時請核實以恤民隱前後凡十餘
奏皆確然碩畫康熙五年條議祀典請
聖祖躬承七鬯舉行郊祀疏入畱中明年春季琬卒於京
前疏忽奉

俞旨遺櫬得馳驛歸葬著有尋烟草致遠堂文集夢墨軒
詩餘

參徐志節熊賜履周御史墓誌銘

路遴字子將少與兄邁互相師友及邁掌銓衡杜門力學有請干當事者輒唾不顧登順治九年進士以母老歸侍終養服闋補刑曹多所平反條議請革九鎖柙牀遷永平知府地濱灤河通七里海每遇水發輒潰堤沈竈遴曰此不容惜費作旦夕計也積俸歲餘率屬鳩工築石堤數百丈水患以甯永平俗多獷悍遴抑奸扶弱不畏強禦在郡三年訟息庭清巡按董國興督學熊伯龍並薦治行第一卒於官士民建祠祀焉著有望古齋集種玉樓詩參徐志路序字雋公順治十一年舉人授崇仁令政尚慈仁三年盜賊寢息後同邑人汪懋燿倡舉放生會于東關潭放生

河之名自此始

萬錦雯字雲徽順治十二年進士授於潛令時版籍多散失桀黠緣為奸賦不均殫力清釐民德之未幾以本籍奏銷降補山西洪洞丞攝汾西猗氏篆晉糧耗加正供三四充上下私橐民重困錦雯量留其一給公費餘悉汰之其他經畫利病種種便民遷廣宗令廣素多盜廉得巨魁寘之法盜風頓息有縣民為鄰盜誣陷力白其寃勤撫字絕苞苴所至輒著循聲擢中書舍人不就歸性耽書史編纂二十一史十年成書家居不入城市長吏不通一刺著有深柳堂集行世孫繡字如升雍正元年舉人任當塗訓導

振興文教士風丕變著有入峰樓筆記

蔣龍光字譽文順治十二年進士授中書舍人歷遷刑部郎中部有大獄大司寇必屬之多所平反羣服其明慎考滿外補通薊道地故衝要責鉅且繁總轄二州六邑漕務海防鹽課驛傳屯田餉稅龍光應機立辦民無勞苦通有豪滑擾害善良龍光至即擒其魁置諸法餘黨震懼潛遁民間有訟輒婉詞諭釋不忍輕加鞭扑薊因大水壞堤千餘丈大吏親勘令民間修築龍光力請給帑奉俞旨發萬金百日而工竣丁外艱起復補福建巡海道承聞逆叛亂之後治以清簡調江西湖東道半載會裁缺解

任年餘補浙江驛傳道嚴禁一切陋規積弊郵政肅清以引年致仕卒于家著有日省錄集慶堂詩稿

徐階鳳字鳴岐家貧幼習農常竊聽塾師講論遂通大義乃勤學順治十一年舉于鄉十五年成進士授永昌軍民府推官時滇初定將卒驕悍或白晝劫財物階鳳入境有遮道告者詣主帥責之主帥慚謝由是將卒稍戢招流亡嚴保甲治廬舍勸耕作日與孺女僂童刺刺蠻語誘掖勸導暇則進諸生講學課文三月之間風氣一變永昌屢旱斗米三千錢率先賑濟所活萬人值進兵緬甸養馬永昌轉順甯之粟以濟軍實于是軍糧無缺民食漸足上方畧

於將軍制府曰如此則緬甸可下果如其言凡藩王幕府
奏議露布碑版之文必馳書幣乞爲之聲名大顯以本籍
奏銷降調督撫將奏雷力辭再四遄歸奉養老母終喪不
出

詔舉博學鴻詞巡撫欲薦之辭曰淪廢二十年不復夢長
安矣自是家居不問世事于鄉里利害大事則毅然持之
不稍避歲大饑指畫賑濟事宜所活甚眾又如止丈畝清
漕規知無不言爲鄉人所利賴方困諸生時歲大稔常至
一富豪家爲饑民乞貸被毆幾斃及成進士富豪踵門請
罪置不問其寬恕又如此所著有滇遊詩草願息齋詩文

綠蔭軒詞讀史隨筆行世子瑤另傳

吳滌字幼清順治十五年由歲貢生授龍巖令潔己愛人
勞心撫字卒于官罷市三日斂助歸櫬邑人德之祀名宦

節龍巖
縣志

盧士登字時謂祖仕奇性坦直好施與父建謨體父志以
周恤爲己任士登幼孤苦志力學順治十六年進士授武
昌府推官值山西寇警民閭挾仇告逆多株累士登鑑別
情實悉爲辨釋丙午入鄉闈取士多孤寒宿學賢聲益著
康熙丁未告歸侍養甲子

詔起舊員借補長蘆鹽運司知事白土臺釐正鹽政盡革

重刊宜興縣志 卷八
諸積弊商民咸被惠焉丁卯以內艱歸家居時凡邑有大
事必詣公庭爭可否若止駐防倡捐賑靡不竭力爲之性
耽詩暇輒與二三故舊會小園薄醉微吟愴然物外著有
本立堂詩詞各三卷黃鶴樓詩一卷十二雅詩一卷行于
世

莫大勳字聖猷順治十八年進士己酉授嘉善縣知縣吏
猾民刁素稱難治善邑田冊混淆有隱田飛役漏賦差貧
橫派代賠諸苦大勳至輒清田按號履畝核丈有田無糧
者自陞有糧無田者自豁均有此號冊有此田其數乃實
而賦役惟均邑糧七萬六千有奇懸欠三萬餘爲設滾催

徵令民自封投櫃禁革耗羨又釐清漕弊革去倉甲行官
收官兌法巡撫范承謨下之各縣以爲式又申請漕白南
糧通收糙米官兌民春建廩設碓民益稱便康熙九年大
水十年十一年旱蝗大勳力請蠲賑活饑民十二萬八千
二百餘口外籍流民待濟者無算在任七年行取入京士
民攀留至涕泣長號有叩階下者願得手澤以志不忘大
勳書一絕云七年赤子是吾民臨別依依渾是真水戀舊
時稱眾母將來堂上有嚴君十四年擢刑科給事中正文
體嚴計典定律例諸疏論者以爲有陸贄唐介之風二十
三年卒于京越四年嘉善民思之祀名宦祠其他懲豪滑

摘奸胥屏苞苴杜請託修學宮諸政並載嘉善縣志自著

有魏塘政畧長子士超邑廩生以文學著名志 參節嘉善縣魏塘政

畧自序云天下事以有意為之其流弊必至于僨轅譬之醫者執經驗之書泥已效之方則固執而不通廢經驗之書缺已效之方則私心而自用皆不可也余辛丑邀第旋里偶得明季武塘令吉水李謙庵先生退思堂集閱再過深嘆服先生宰邑之善可著為法然竊自問當授司李邑令非吾事也胡用是集為因藏之篋中束不復覽後奉朝廷更定甲乙官制改授邑令憶及是集可援以為先資至戊申十月銓除武塘令即傳至余不禁瞿然曰奇矣哉天下事非人所能逆料也一至斯乎此中前定之數殆天也非人也乃發篋檢先生退思堂集熟玩而詳味之視善邑之事瞭如指掌是集也詎非醫人經驗之書已效之方歟己酉春暮莅任環視善邑民風土俗大非昔比噫今日之武塘豈昔日之武塘也哉治今日之武塘豈昔日之治治之也蓋先生當日有治源雖然究無不可以昔日之治治之也徒法以行未為盡善有治法余若踵其法而不握其源是徒法以行未為盡善

余惟究其源而不泥其法是恃源而往庶幾近之先生書內廉潔一冊非治源乎余七年以來每于自公之暇舉目仰視退思堂額未嘗不惘然懼憬然悟也朝夕兢兢惟覆鍊之是虞豈敢作非分想今幸邀恩得以循例覲揚形陞謬膺鉅典不禁汗背而都人士進而請曰先生七年以來所釐然而見諸施行者皆秩然可昭諸法守者也獨非醫人經驗之書已效之方乎以視吉水李先生竊謂過之而烏可以勿傳余惘然無以應且余初無善政之可紀聞有一二釐剔率皆招尤叢怨祇以身在地方日擊時事不敢惜身名而避怨勞故直抒鄙見或詳之上臺或告之通國冀俯鑒苦心得為斯民請命亦厚幸矣豈敢出稿以問世且崔顯題詩已在上頭而操觚者復問黃鶴不瞠乎其後也耶辭不獲已乃遍按之塵封蠹蝕中得申詳若干條文告若干條廣撰述也若干條并以述職一卷昭官守也殿以雜文一卷廣撰述也若干條并以述職一卷昭官守也殿以雜文先生者亦非知余者非知余者以辛丑獲讀先生退思堂集於今日亦復有刻以附先生之後此中殆有天數焉第余之願學先生者惟廉潔二字未知有當于先生否敢還問之邑中父老

儲方慶字廣期好學善文康熙五年鄉試第一聯雋會試
第三知清源縣時軍興供億日繁方慶力請于上官糶糧
芻芟胥假貸而辦不徵民間一錢又山水數漲爲城害修
築白石堰禦之明年春水改道而南喜曰可保清邑數十
年無患矣乃建白龍神廟于堰以鎮之戊午

詔舉博學鴻詞董學士訥舉方慶以應清民攀轅環泣者
數千人入都待試十閱月足不過公卿門試罷復以原官
用時適抱疾遂告歸自號曰遯庵兄貞慶工詩詞子五人
並登甲乙榜

許毓芳字尹吉康熙十一年副榜由教習授任邱令九年

計最擢邠州復遷北通州三年致仕歸歸六年而卒毓芳
精力過人智慮周密任邑在九河下流風多水災爲築堤
捍之親自督役兩行草宿無所避北盡趙北口南暨高陽
百二十里堤成水患息民號許公堤歲祲民饑捐俸勸諭
設廠粥以食餓者不足則繼以發倉平糶凡七閱月全活
者萬人其蒞通州也旗莊張某踞民產甚夥歷控三十年
莫爲直毓芳覆訊則按籍歸民旗怙強挾部檄來要毓芳
據法爭部弗能奪通距京四十里每遇

駕出先期採辦不擾民亦無廢事時安溪李相國光地巡
撫京畿知之最深其自縣而州自邠而通皆其所薦擢也

毓芳嘗言爲州縣者須十分精力故在職時夙興夜寐獄訟盈庭立時遣決不使胥吏索一錢有輕罪卽解釋務在安富息貧通州任邱民愛戴之爲繪像生祀焉

郁士超字峻升別字古愚康熙四十五年進士選授扶溝令扶境環河鄆陵爲其上流素有水患士超請于鴨岡口審子坡築堤扶民踴躍堤成而扶永無水害至今賴之值大旱蝗生遍野齋戒虔禱甘霖大沛蝗無留種秩滿內陞主政以年老告歸

儲右文字雲章康熙十六年舉人銓選湖廣京山令縣舊無魚鱗字號冊丁田多隱漏詭寄通欠日滋右文按畝釐

定冊籍丁田並核實戶省耗羨革串費京山自是無逋糧又縣濱江湖盜賊數匿乃力行保甲法懸牌編戶奸匪屏息值大計督撫合題卓異至京鄉民泣送者數千人北引見會閩撫請才能官任海疆特命以知州銜領福建甯德縣事縣瀕海塘田多爲潮水衝陷右文協工修築塘壩務令鞏固塘成而甯德始無水患又縣東接官井洋商船漁船多接奸匪右文請鈐印編號十船聯爲一甲又請增設哨船弁兵內外巡緝而洋患乃得甯謐在任六年以積歲吏牘勞頓力請養疾歸解組後展卷灌花適然自樂著有敬義堂集四卷文牒十卷

吳曹直字以遜生有異稟日誦數千言忤孝友年十二丁
內艱擗踊如成人弱冠遊儲在陸門三年盡得其傳康熙
十七年舉于鄉甲辰謁選授韓城令行取陞刑部雲南司
主事轉戶部浙江司充文武兩闈同考官簡廣東正主考
以年老乞假歸卒于家初任韓城韓邑舊例計里派金以
供邑宰曹直蹙然曰吾自有俸入何忍復腹赤子膏立革
之韓向催科用徒隸走民間叫囂隳突直至給牒立限有
沈寃雖舊案必爲平反邑無寃民修文廟設義學課生徒
教化大行以卓薦入都韓民攀轅卧轍不得留則捐金建
書院每誕辰立壽會老幼拜跪號曰清官社云既擢秋曹
轉司農馳檄賑梁城災民全活以億計又嘗監京倉革積
弊杖奸胥以此忤上官會大司寇張清恪公論其廉事得
解及典試粵東所得多知名士張清恪公復欲薦爲守固
辭告歸構屋竹閉朝夕吟咏足不躡長吏庭蕭然自得見
者嘆爲地行仙所著有恭受堂文集行世

萬丹詔字孫詒康熙二十一年進士授石城令歲饑奸民
乘閒竊發丹詔擒戮渠魁餘黨解散隨給常平倉穀賑恤
流亡先發後報全活甚眾又捐俸修橋梁食鹽均戶口凡
便民事知無不爲以不善承上官落職息影杜門蕭然世
外課子弟讀書敦行至老不倦子作霖另傳

萬廷詔字孝升康熙二十一年同從兄丹詔登進士授永壽令永邑徭派繁重廷詔廉其弊正供外一切耗費悉除之丁夫郵傳捐貲僱募民不知擾值甚旱親行阡陌散給牛種請捐請賑民無饑色攝邠州獲盜魁寘之法脅從者悉宥羣盜感愧攝涓化民素聞其治庭無訟者期年囹圄爲空又攝三水有匿奸數年未獲莅任甫一月卽偵得之人服其神明年五十解組歸永民鑄珉南城門曰萬公廉明正直去思碑

儲掄字瀛傑性醇謹嗜學康熙二十年辛酉舉人壬戌進士知江西臨川縣循聲茂著歷二載卒於官臨川人士紀其治績十六則崇祀名宦

郁士選字遂掄康熙二十三年舉人以薦舉任容城令甫莅任值大旱士選徒步虔禱數日大雨鄰境蝗蝻蔽天躬宿八蜡廟爲民請命蝗弗入境鄰郡昌黎縣大饑奉制府命往賑擅發米至六千餘斛制府亦弗能罪玉田梁城大水縣報六分災藩司命士選覆勘還卽以十分災報他如修學宮葺楊忠愍祠捐俸倡建白溝河橋等政不可枚舉客有以納妾請者士選曰家本寒素甫邀一命遽棄糟糠耶晚歲卒生二子

蔣錫震字豈潛康熙四十八年進士幼喜誦莊騷文選遊

儲在陸門擊賞其詩古文詞因以遺文囑編定焉嘗遊齊
燕豫楚章江淮陰賦詩盈橐戊戌銓選得直隸慶雲令時
苦旱甫莅任卽大雨已亥飛蝗入境輒殲時監司議浚無
棣河檄亟下他邑莫敢言錫震極言其傷財害民之弊牒
數上事乃得寢修城東南文星臺魁星樓是秋雋者四人
又修名宦祠鐫石表古延陵臺莅任三年政爲諸邑最以
不善上官鬱不得志賦詩曰舊與高人約耦耕乍嬰塵網
負初盟只今脫幘須投地倔強安能更屈卿遂告歸家居
十八載惟與同志賦詩飲酒以自娛著有易說中州志見
聞雜記清溪詩文集子汝誠工詩古文詞著有曲木集

潘宗洛字書原明工部郎中守正曾孫康熙二十七年進
士授檢討直隸南書房試蠲甘肅四十二年錢糧上諭當
南書房試蠲甘肅四十二年錢糧上諭當開其蓋自宗
上指定第一命提督湖廣學政試復第一賜御書朱子六言詩一幅時楚南紅苗新服疏請許熟苗
應試獲

褒旨任滿人都充日講官起居注御試侍郎以下百六十有三人宗洛復第一是秋
簡順天正主考歷晉內閣學士兼禮部侍郎總裁

政治典訓掌翰林院掌院學士印尋簡湖南巡撫戶部咨
 商人王綱明等稱鉛山不禁不獨鉛劬易得而鼓鑄亦不
 遲誤應令開採宗洛密疏請封禁從之時衡陽安仁水衝
 失額田九十三頃有奇臨湘水衝田四頃九十畝有奇宗
 洛皆力請豁之又請免墾荒之期禁楚民鬻產入川捐俸
 積穀減糶裁郵遞規例又因洞庭之險楚南人士應鄉試
 之難疏請另差考官至長沙考試分中楚省舉人額數之
 半部議格不行至雍正年間湖南北始分闈其議蓋自宗
 洛發之也五十二年罷歸五十三年媒孽者構偽券案事
 尋白五十四年二月密雲城圯奉

旨派十二大員分修宗洛與焉九月以疾告假歸冬卒于

家著有文集二十卷

參儲大文存研樓集 請禁開採疏 題為湖南開採不便情形仰懇

照舊封禁以靖邊隅事康熙五十年正月陞任撫臣趙申
 喬准戶部咨為查明虧欠事內開商人王綱明等稱鉛山
 不禁不獨鉛劬易得而鼓鑄亦不遲悞等語應將湖廣產
 鉛之處停其禁止仍照舊開採茲于五月間商人王綱明
 等行至長沙稟請給牌開採竊思戶部既有定議臣亦何
 容置喙但臣本一介孤踪受恩最厚理應知無不言言無
 不盡況本年三月跪受 聖訓旨首及安靜臣雖下愚極魯反覆深思
 民之道擾之不如安之動之不如靜之也今部議開採一
 事在湖南有大不便者請詳悉陳之臣前任學政時考試
 湖南七府二州親身徧歷確見衡郴等處產鉛地方山深
 谷邃境通黔粵人雜苗獠惟宜安靜不宜擾動今臣身任
 封疆之責復檢査開採禁止根由蓋自康熙十九年聽民
 開採以後司道府州縣因輿情皆言貽害非淺紛紛具詳
 彼時督撫次第封禁然而奸貪之徒尙有赴部具呈請開

者部文移查屢至屢覆案卷炳存幸賴我

旨聞開礦事情甚無益于地方嗣後有請開採者槩不准

行然後好徒絕想地方甯謐者于今八年皆賴

皇上特旨之所賜非督撫諸臣之力所能為也今戶部頓

忘明旨刑為停其禁止之議臣不解其何故道路喧傳以為

商人浪費庫帑虧欠難完所以朦混戶部借名採取白鉛

以資鼓鑄其實希圖偷竊黑鉛銀礦以飽囊橐臣亦未敢

深言第就湖南情形而論愚民何知利之所在身命不顧

彼見商人僱募工價勝于力耕必將爭趨競赴田畝拋荒

正賦漸缺其為不便者一山中多一夫田閒即少一農生

之者寡食之者眾米價立見騰貴貧民立見乏食無論湖

南之米不能下濟江浙而境內先不足自贍倘致貧民

失業流離必須多方救濟則雖商人之虧欠補清終屬得

不償失其為不便者二承平日久生齒日繁深山封禁有

年不無居民廬墓一旦遷徙頗未易言偶或損傷情殊可

憫其為不便者三苗穠生性好利若見土人開採必行劫

奪彼此格鬪必有殺傷文武官弁私貪陋規隱諱重案必

釀禍階其為不便者四日間開採之事獲利虧本全憑造

化竟有開挖未深其砂已盡者如此則必商人之虧欠愈

多自願不暇其招集之眾易聚難散或起盜心或鼠窟穴

地方自此多事萬一至于與師動眾則軍需糧餉商人能

任之乎其為不便者五凡此五者皆湖南切實情形未可

與他省並論者也臣忝任封疆若畏首畏尾不敢早言異

日一起事端然後為焦頭爛額之舉即身受譴責不足蔽

辜誠不得不為未然而過慮也抑更有請者伏思我

皇上聖壽屬午南嶽衡山正應午位每年恭遇

萬壽聖節撫臣專主禱祝無疆凡係南嶽來龍左右允宜

秘護精華培養元氣豈容若輩匪人恣意剽挖臣心惶悚

日夜靡甯是以不避仇怨密疏人告伏乞敕部永行封禁

則湖南億萬生靈均享太平無事之福而臣區區愚忠愚

孝之心亦得少安矣請長沙鄉試分闈疏畧題為湖

南赴試惟艱請南北分闈以取人才均恩化事臣看得

湖廣通省幅員遼闊人才眾多臣前任學政時查湖北府

州縣衛學七十有七考額取新生九百一十四名湖南府

州縣衛學七十有七考額取新生九百一十四名總計湖

南進學額數較湖北更多湖南能文之士較湖北相埒祇

因中隔洞庭致有南北之分每遇鄉試之時正值秋水汪

洋之候貧士拮据資斧行至湖濱一遇風濤險阻守候誤

治績

皇

期有志之士或至痛哭而返甚有科場期迫念切功名揚
 帆冒險瞬息而遭覆溺者往往有之以致多士畏慮裹足
 不前其能至武昌而入場者十無二三每科中式舉人不
 及湖北四分之一諸生咸以此向臣泣訴求為題請分闈
 分額臣以江南陝西俱係大省各設兩撫潘臬而鄉試總
 歸省城從無分闈分額之例湖南不便獨矧異議上瀆
 宸聽去年辛卯科鄉試諸生又具呈訴臣亦如前拒絕恭
 遇康熙五十二年
 萬壽恩科士情踴躍咸有上進之心彌切望洋之慮情願
 自捐廩糧等項蓋造貢院懇求分闈以仰副我
 皇上壽考作人之至意茲據布政司佟國勳提學道蔣德
 昌詳據七府二州諸學生監公呈彙詳題請前來臣思湖
 南隔越洞庭實與江南陝西水陸無阻者不同我
 皇上日月照臨無幽不燭膏澤普徧無遠不周湖南士子
 既有此種隱衷臣何敢壅于上聞倘蒙
 皇上憐其跋涉之艱難鑒其愛戴之真切伏懇破格
 俞允另差正副考官就于長沙考試分楚省舉人額數之
 半則不特湖南士子感激高厚之恩而土司紅苗亦快觀
 文明之盛矣至學道一官屆
 鄉試期揀委一員合併陳明

萬晉豐字沛侯康熙三十二年舉人令永清邑有大獵素

藪盜窟穴深邃自部使者以及奸胥桀吏莫不締交為邑

大害晉豐甫下車廉得狀召之至傲睨無所畏陽以好語

遣之徹夜屏左右自治官書達上臺挈胥役潛至其家捕

繫之立斃于杖不浹旬請貸之緘至者十數已無及矣邑

大稱快未幾以疾卒于官

潘眉字元白瀛選子以附貢生教習鑲白旗期滿授溆浦

令時吳逆未殄眉謁大將軍願効力麾下大將軍壯而許

之命督餉策蹇崎嶇運糧不絕師賴以濟大將軍欲特疏

上聞不果回激任又爭辰溪驛協濟事得請民大悅建生

祠調遷安令尋擢大名府同知兼署濬縣篆奉委驗河賑饑多稱職真積蠹于法縣民稱快以卓異

賜蟒袍一襲擢興化府知府禁雜派均典稅絕苞苴興學校制撫咸器重之卒于任紳士倡助成殮眉長于詩古文詞嘗與陳其年定今詞選行世著有楞年集

萬廷仕字大士由拔貢生擢令臨漳政尙清靜甯一期年延無訟者力請蠲免浮糧得允邑人德之年未四十卽解組歸放浪于善卷菴畫閒與邑中名士爲詩文會執詞壇牛耳終其身著有餘庵集

王斗樞字文拱以序貢選訓導從征有功擢羅城令地近

蠻疆稱難治斗樞懸重賞捕得盜魁置之法飭各汛嚴哨巡盜稍止乃修城浚隄令民懇荒儲穀復以學宮隘別建義學召諸生講習其中治稱最調天河縣迫苗疆寇盜充斥斗樞知不可以德化請兵剿撲擒斬巨魁餘悉加撫恤徭獍懾服陞定番州知州有武弁虐苗民激變州人震駭單騎往諭獠苗素服其誠信遂解散境內獲安尋以事告歸

蔣雯字羽儀事母孝好施與康熙五十年雋南省試雍正七年揀發滇省試用知縣乾隆元年任河陽丁艱歸起復補騰越州地故邊徼諸蠻或依阻騷擾雯單騎往諭皆羅

重刊宜興縣志 卷八
拜聽命調通海令有白宦者怙勢佔民田數十頃至廉
得其情將直之白惶急賂以五百金不受立白于憲悉返
民田正其罪民爲立石頌德又調晉甯會澤所至皆有聲
儲之盤字宥銘康熙五十年舉人初任陝西平涼縣有異
績甫八月超遷雲南楚雄府知府理煩任劇長于讞斷他
省有疑難事多倚任之擢迤東道安揆交趾安南諸土司
得撫綏駕馭之法尤好獎勸人才知楚雄時拔諸生中有
名望者延入署內資以膏火數與講論俾克有成疎于財
屬吏有逋負輒爲代償餘則分給宗黨子起綸知新會寶
坻縣事亦以清謹稱瑄英武岡州同知

李飛鯤字圖南康熙五十一年進士選浙江慶元令慶括
蒼下邑民疲俗悍飛鯤蒞任會歲饑不待申報卽開倉散
賑不足捐俸倡蠲全活無算暇則單騎問民疾苦在任九
年調海甯攀轅者以萬計時修築海塘飛鯤以西海防同
知兼署甯邑事糾工庀材必親點驗晝夜宿塘上搶修堵
築不少懈適風挾潮湧水勢漫塘上飛鯤朝服禱神願赴
水以救民須臾反風退潮環塘者咸額首稱慶士民繪迴
風退潮圖以祝

路衡字垠初康熙五十四年進士辭館職告歸侍養尋丁
外內艱服闋授順昌令民性摯悍難馴衡懷以恩信胥悅

服感化先是邑令按行村落徵收稅課供帳驛騷吏胥需索無度衡先期告戒輕車減從正供外不費民間一錢復召鄉耆咨地方疾苦有訟輒就近呼兩造剖決民益懼怵見學宮頽敝急召紳士協力重修城南瀨水奔駛湍激渡者多沈溺捐俸造浮梁通利濟行旅德之一切興除諸務次第舉行以積勞成疾莅任七月卒于官

王忠武字珍序康熙五十六年舉人甲辰挑選授羅次令以廉能調東川府會澤縣土司烏蒙祿氏接壤烏蒙叛率師攻城忠武悉力守禦期以身殉浹月援兵至賊平大吏坐以糜餉罪罷職聞者扼腕乾隆元年以楊文定公名時薦授邛縣令三年頌聲載道調繁巴縣治尙寬平精聽斷嘗因事赴省攝篆者捕得盜六人已定讞忠武歸訊察其寃立與開釋吏以主名未得請徐之弗聽後果購獲真盜如其數遠近驚嘆爲神君年七十引疾致仕

蔣天麟字廉石由國學考選授職出爲雋化令值歲稔弛負鹽易米之禁全活甚眾有商人因鹽事囑吏挾貲以獻立杖吏并杖商人民大悅轉調咸陽邑當要衝值

聖駕巡幸祖帳供具出俸貲以給不索百姓一錢民爲建祠瞻拜旋擢鞏昌司馬轉允昌司馬允昌爲滇邊郡徭民雜處天麟撫以恩脅以威諸土司皆懼服閱數年調閩之

興化轄莆仙兩邑濱海依山萑苻時警乃修兵備慎樓櫓
禁樗蒲嚴緝捕境內肅然後仍調允昌以不樂仕進告歸

補遺

宋

蔣循祖紹興十一年以右朝散大夫知建昌軍當是時建
昌屢經兵火官署學舍皆頽廢循祖至視事數日詢考舊
制次第悉新之又繪先儒李觀像於學舍以風示來者士
大夫賢之比於漢黃霸云

元

吳熙字仲庸一字雲溪芳莊里人高祖文宋將仕郎越州
會稽主簿祖萬鎰宋鄉貢進士父孟堅右庠中吉齋上舍
熙種學績文綽有令譽元仁宗朝鄉進士初任建康路句
容縣儒學教諭再轉鎮江路濂溪書院山長延祐七年轉
廣西道梧州路儒學教授至則葺黌序制禮器遐陬遠夷
彬彬文物之盛秩滿有司上其績元統元年遷將仕郎鎮
江路丹徒縣主簿未任丁父艱居喪哀毀過禮遂卒子三
楛溧水州判官梓淮南省理問森不仕楛子浩揚州路蒙

古學錄

明

儲敬受字克莊洪武庚申舉明經授陝西葭州學政北平

涿州判官以最薦擢四川道監察御史兼理兵備事海南諸郡寇賊悉聽督捕嘗屯兵大藤峽賦詩有直驅貔虎三千士谿洞猺蠻指日收之句再渡南海有十年鞍馬事戎行未有涓埃答聖皇之句所著有霜臺集

許勝字守謙永樂七年由黃州府訓導擢廣東道御史丁憂復補左春坊左司直郎改大理寺評事未幾陞刑部主事建言下獄謫戍保安衛尋復貴州道御史宣德元年巡撫江西陞右都御史巡撫卒

吳楚字景春芳莊里人以茂才官泰和知縣是時邑人楊士奇爲大學士子稷居鄉無賴士奇密與之書曰士奇負罪輒有私瀆伏維不鄙特爲垂意豚犬子在家者幼穉無知每爲親友及里巷無賴子弟牽誘爲非不一而足聞之痛心然隔遠不能自治又其母病不可取來恃愛控告伏望召至嚴切訓誨之教而不改則督治之夏楚之施千萬勿吝更乞遣的當人伺察其平日相與爲非者而懲誡之至叩至叩親戚中有善良者四人梁叔車叔莊康榮楊鶴煩召至以一言之重託此四人照看寒家顛賴顛賴僕以私事奉瀆誠爲負罪但念賢大夫爲一邑父母兼治教之任況僕又忝在素契豈可自外千萬加意又聞庠中有恃愛爲非不敢不告幸察楚得書嚴督之後以與上官不合

去職泰和之人咸惜之先是楚將之任其母詔以常祿如
不給於用取諸家楚頓首奉命故其莅任也裝貲甚富逮
解任時僅圖書數簾而已一時士大夫多爲詩文贈之
潘亮字明甫天順間任樂安縣丞剛直廉明吏民畏服在
任八年及歸行李蕭然饗旅不繼士民憐之爲醵金以助
後官真定府同知卒祀樂安名宦祠

黃時字孟寅弱冠登正統甲子鄉薦兩仕儒官以善教著
聲成化七年以臨汾教諭聘爲湖廣主試燭鑑精明去取
允當巡撫御史及布政按察諸公咸敬羨之事竣旋旃同
年生巡撫吳琛贈之以詩有一時人物歸公論五色文章

愜眾情之句後陞平樂教授告歸子忱貢生長興訓導

黃金字汝礪以歲貢生中式成化戊子順天舉人官南雄
府同知南雄俗雜夷夏號稱難治汝礪不鄙夷其民威惠
兼至而一出以誠士民懷之以告養歸

徐文燦字德章以祖溥蔭官尙寶司卿器宇寬和居官不
苟正德初逆瑾竊柄令人索重賂許以美官燦謝絕之瑾
大怒忽出內批發回原籍爲民瑾誅乃再起用

杭士鏞淮孫以蔭官上林苑監左監丞少學於唐荆川居
官志行不苟

萬溥字宏濟太學生官南雄通判始爲瑞安主簿盤詰海

重刊宜興縣志 卷八
船盡卻其餽署雲南知縣上官以鋪陳名色科派小民溥
悉革其弊在南雄權太平關常額外悉以惠商
萬春字子仁士和冢子以廕授中府都事遷後府經歷擢
雲南鶴慶府知府性樸實渾厚嘗以至誠待人初在中府
後府嚴管鑰肅軍伍武弁所得糧廩毫無濡染及知鶴慶
府羣苗爲梗劫縣官春以大義諭之亂乃定地民夷雜居
法網廢弛春以安靜無爲愿樸待人遠近向化大盜李天
成招集亡命倚窟穴爲民患春密捕以計擒之其黨皆解
散居官儉約出入鮮騶從嘗隨一奚奴行衢市中路人摩
肩接踵莫知其爲太守也吏民皆愛服焉

許有節字子和茫溪里人以舉人由仁和教諭歷任房山
漢川知縣房山地瘠民貧有節捐貲代償逋賦漢川素有
屯糧多被豪戶侵隱有節莅任逾年釐剔一清教民立溝
塍備旱澇災稔得不爲患兩邑至今誦之族子用卿字羽
可亦以舉人歷官光澤鉛山甯德等縣知縣所至有神明
父母之稱

蔣應震字乾初萬厯癸未進士知宜春縣事宜春地故瘠
薄民有鬻妻償稅者應震廉得其情立捐俸贖之地產毒
草食之卽死民有仇怨輒先自盡仇之者家立破應震先
嚴治服毒家以不救罪責令埋葬而後理曲直奸民計絀

刁風遂絕後擢建昌守以丁外艱歸

路雲藩字伯封孝友篤學以貢生任金壇望江教諭課士嚴而有恩署縣篆值大水力請當道設法蠲賑皖屬惟望江獨得減賦然以此忤上官卽解組歸祀雷江名宦邑鄉賢祠子文幹字古空嗜古力學老而不倦舉鄉飲賓

湯啟華字君采別字闇生萬曆三十五年進士知山東黃縣縣故羸邑地僻民疲舊例令富民牧馬苦徵索責償爲患啟華徵其稅於田而令在官人養馬并勒爲式縣有林序班者以貲雄里中恣爲不法且巧爲蜚語以中諸擿發者啟華廉得其實下之獄時歲苦旱因請之巡按御史曰

決林某天當雨御史憚啟華嚴毅卽日發遣而雨果如澍云任滿行取戶部清吏司郎中轉廣東督學參議卒於官史垂則字貞卿萬曆三十五年進士謁選得會稽令有不孝子持刀向父父以告適有割股療親者垂則令鼓樂綵旗導于前械持刀者踵于後遊歷通衢其人伏地求死乃釋之後以孝聞曹娥壩地素荒蕪募民開墾得田萬餘畝三年復其租民多沾其利莅任五載以卓異擢戶部主事遷郎中奉命督餉甯武卒于官貧無以殮賴直指郭公力旅櫬得旋故里子鴻磐萬曆戊午舉人

王彝章字道美萬曆己酉舉人巢縣教諭有葛生每課必

至至必殿既而請曰生駑下若此幸師有以教之彝章嘉其志爲開導者數年竟成進士陞南康推官捐俸修白鹿洞書院

陳景潞字彥甫萬曆四十年舉人累官温州府知府內自郎署外自邑令迄爲守率以廉潔稱爲溫守時有海寇劉香者窮蹙乞降當事難之景潞力主受撫東浙以安適以他事忤浙撫被劾歸軍民赴當道乞留者以萬計

湯欽止荊州照磨署宜都長陽篆卓有政聲撫按交疏薦之歷廣東戎幕王府審理

楊大賓字君山中貴州戊午科鄉試任長興縣教諭骯髒負氣節見義勇爲非禮不能妄干造士務持大體邑令某以私怒欲庭辱一諸生謁大賓探意可否大賓不爲動色令慙而出陞知州去諸生醵金鐫姓氏貞珉識去思焉歷官湖州府同知

吳應恂字九迪別字旭海芳莊里人崇禎十年進士知福建同安縣未至五十里卽有亂民遮道紛控先是佃民與業主爭柵大小聚徒數萬借斗大爲名抗租插掠守道施邦曜按同安數千人圍署以爭應恂以計散之邦曜以爲能將假以兵符便宜行事且簡數力士相衛謝弗用應恂既訪得亂魁林建宇周家檜二人計以賊攻賊多方招來

家檜俾內外夾攻建宇成擒賊勢稍斂而是時副總鄭之龍雄鎮一方撫軍與之魚水懽謂須武臣力并檄擒家檜賊勢復盛之龍統精卒駐同安搜索經月不得應恂密稟撫軍以地方荆棘不如解兵專意閒謀伺家檜出入伏猛士獲而殲之則兵不勞而賊藪可盡撫軍許之家檜旋受擒同安以靖之龍恨之刺骨及邦曜內用應恂遂告去起補長沙到任卽爲清戶籍定糧役減罪恤罰數言決獄一時有吳青天之譽會湘潭令缺撫軍方檄之兼理而流賊已破荊州武昌諸郡矣官兵屯長沙糧械告缺人無固志應恂運糧千餘石銳器若干比至而師已潰乃赴江西走謁督師從新撫何騰蛟統左兵恢復舊疆長民老幼遠近欣接不啻失乳子之逢母也甲申三月燕京聞變左兵駐楚省號稱數十萬遍地橫行十倍於寇應恂禮接懽馭盟其將之有肝膽者境內粗安總兵方國安突收四萬人爲合進京所過劫掠前騎抵善化兵民譁鬪善化令不知所爲延應恂爲之調度市肆恬然國安經長沙境五十里寸草不動士民爭欲建祠以祝應恂力辭之騰蛟聞之疏薦於朝且聘爲武昌監軍而戶部四川司主事之命下矣倉皇去楚祖道攀轅者直逾洞庭湖而返比至南都見朝事日非告歸國變後卒

重刊宜興縣志 卷八
潘紹謨天啟間副貢任廣安州同三年政績載入州志
蔣濬貢生甯國訓導深得士心後致仕歸

國朝

陳宗石字子萬別字寓園貞慧季子國子監生官山西黎
城縣丞以解兵餉袁州功陞授直隸安平知縣安平舊例
一切公費皆派諸民不堪其擾宗石履任盡革舊習復捐
俸修葺學舍建講學亭於明倫堂後集諸生爲文會於中
復與同官平湖陸公隴其柘城王公培刻明儒呂叔簡呻
吟語而自跋其後以爲人心易放而難存人欲易熾而難
遏則人人有疾痛中而人人不知其呻吟也先生身無疾

痛而不忘其呻吟此先生呻吟所以傳也倘後之學者讀
先生之書而各知己之疾以呻吟之則物欲漸消天良漸
見庶幾先生之呻吟不僅自治其疾并以治人之疾矣江
蘇撫軍湯公斌謂其屬吏曰官無大小須要稱職方可上
不負君中不負身下不負民若安平陳令可稱三不負矣
內擢戶部陝西司主事勤慎稱職以被議鐫級遂不復出
宗石少孤露家貧無藉贅婿商邱侯氏發憤讀書所交皆
當世君子而與禮法之士尤親故諸兄以辭賦顯而宗石
獨以治行稱云

增修宜興縣志卷之八
 人物志
 天命流行物與无妄理只平常學唯真實醇儒一脈道
 在身體力行非徒博道學之名而已宜邑清淑所鍾醇
 修實踐之士往往閒出亟表唐彦思以下諸人亦以見
 斯道之不泯於人間如此
 宋
 唐棣字彥思政和五年進士與晉陵周孚先恭先同事程
 伊川先生初見問學伊川曰入德之門無如大學今之學
 者賴有此一篇其他莫如論孟棣於是知所致力他日問

增修宜興縣志卷之八

人物志

理學

天命流行物與无妄理只平常學唯真實醇儒一脈道
 在身體力行非徒博道學之名而已宜邑清淑所鍾醇
 修實踐之士往往閒出亟表唐彦思以下諸人亦以見
 斯道之不泯於人間如此

宋

唐棣字彥思政和五年進士與晉陵周孚先恭先同事程
 伊川先生初見問學伊川曰入德之門無如大學今之學
 者賴有此一篇其他莫如論孟棣於是知所致力他日問

格物如何曰但立誠意去格之其遲速卻在人明暗又問克己復禮如何是仁曰非禮處便是私意如何得仁須是克盡己私後只有禮方是仁又問知言養氣曰知言然後可以養氣問養氣以義否曰然棣不樂仕進名不他見獨著於程氏遺書編次伊川語錄二卷程門弟子中棣最詳明觀其問答可為務實而篤志專事為己之學者矣邑人周衝刻其所紀師說凡一百四十餘條蓋將以風鄉人之嚮道也歷官秘書少監

參徐階鳳志鄉評備考

吳宗旦紹興三十年進士歷官工部尚書直學士院嘗遊學朱子之門及韓侂胄攻朱子為偽學宗旦疏救侂胄大怒帝心昇之得免於禍尋乞致仕卒

明

周衝字道通正德五年舉於鄉司訓萬安人人自喜得師擢應城令務以德化民民立生祠祀之以耳疾乞改教得邵武府教授日聚諸生講學士風丕變遷唐府紀善王世子以讒聞失歡十餘年衝悟以慈孝至情王為感動愛世子如初久之聞母訃一慟而絕學者稱靜庵先生初衝在萬安從王陽明講學得聞致良知之說南元善輯陽明傳習錄中卷有答學者要書七篇答周道通書其一也自應城之京復從湛甘泉遊得聞隨處體認天理之說覃思研

精會而通之曰湛先生之體認天理卽王先生之致良知也陽明嘗稱之曰吾門穎悟莫如徐曰仁篤實莫如周道通甘泉亦稱之曰知行博約定其指歸衝旣卒其友晉陵毛給諫憲誅之曰不溺於禪不流於俗是足以知衝之學矣著有養正錄會極約希顏曰鈔與蔣信新泉問辨錄孝經刊誤參節王陽明文集徐志萬吉字克修爲人方嚴剛峻刻意師先儒尤尊朱子平生冠履飲食拱揖趨走一遵矩矱未嘗見其有戲謔笑傲箕踞跛倚之容孝事父母自侍養及居喪皆中平禮友愛其弟善至老亦嘗異錢帛教諸子先志行後文藝寬而有法

接人少寒暄語似落落寡情然久與之處真意流溢益知也其自奉儉薄而性好施予三族中待以飽煖者若干人義所當濟雖百計委曲未嘗有倦色人有善輒稱嘆不置有過必面折之論當世事講義利爭是非雖遇達官勢人反覆辨析必伸已說而後已年十七遊庠爲諸生三十餘年德成行尊後學者多師事之稱爲古齋先生以其行古入之道其友同邑周衝學於陽明聞致良知之說歸以語吉吉以其說異朱子不肯信後得交唐荆川其說與衝合乃釋然曰道通愛我其說固未嘗背朱子也嘉靖己亥以序貢司訓桐廬邑士鮮敦志操吉與講明義利之辨時

激以釣臺故事曰若輩非子陵鄉人耶諸生乃稍稍振勵已而二子士亨士和並舉進士誠之曰吾願汝做好人不願汝得好官也吉晚年氣象和易如冬日煦人人益樂親之卒時年六十有三

節楊懷遠鄉評
備考 參徐志

曹珂字國用天性篤孝十歲時常從十數里外負米歸養口吟昊天罔極之句家貧嗜學志為聖賢從湛若水遊聞體認天理之說悠然有會其學以敦倫實踐為主以不欺屋漏為宗正德己卯舉於鄉再上公車不第遂不復應舉曰吾早不能祿養忍以祿自養乎嘉靖二十三年遙授都察院經歷司都事儿子姪得第輒嘆曰人家博一科名不

如成一善士家居嚴肅不苟笑言姪三暘任知府歸猶如童幼時稟請惟謹建祠收族撫育遺孤居常無一字干郡縣里有訐訟者相戒無使曹都事知也卒時壽八十有四

參唐鶴徵府志
節徐志

唐音字希古原籍武進常從唐順之讀書宜興樂其民俗淳樸遂徙居焉少多病其父令棄學音顧晝夜刻厲不廢也性狷介不妄交遊聞鄉先生毛古庵講學造其門又聞魏莊渠先生講學於吳從之受業嘉靖七年領鄉薦當對公車竟謝不往讀書必反覆玩索推見古聖賢心即兩先生言心未慙不敢輕諾必明辨審思期於有得而後已久

之就選雜澤縣令一以實心幹理邑地瘠民貧音曰民富而後可教也勤於勸課不數年民以饒足其才贍足濟其志又能斷以必行未嘗以上官意旨爲趨向在任五年請去者三一以議督民買馬一以爲要人建坊一以欲置巨奸於獄上官皆從其意挽留之督學使者至廣平論諸士子於庭曰諸生何從學聖人乎學雜澤令可矣音居官惟務勤儉每語人曰勤儉者養廉之本也其治民專務德化綽有政聲壬子入覲卒於京所著有四書五經質疑若干

卷

參徐志 唐 鶴徵府志

王升字世新原名革督學耿天臺牒送歲貢改名升少孤

奉母以居偶從友人飲且奕母有愠色終身不飲卽遇奕弗視也爲人志節堅貞安貧好學初受業於萬古齋又學於唐荆川併遊羅念庵王龍溪之門上下討論多所領受自守繩墨益嚴總督胡宗憲謀梓荆川左編延升校讐時幕府士如雲獨升以嚴見憚會有以失律論死者胡公遣客邵生諭意曰子爲一言千金可得升曰其人罪當死死之由法可以生生之由總戎何溷王生爲嘉靖四十三年歲貢司訓京兆而邵生者復入宰相高拱幕見升笑曰猶然老儒耶相君欲重用子試往一見何如升不聽久之遷國子學錄張居正相亦欲致升門下託升友艾穆要之曰

行典制敕矣升謝不應出為成都通判有廉譽遷鹽課提
舉遂掛冠歸升之學以程朱為準的嘗曰孔孟而後元公
涪公具體也正叔晦翁正脈也萬曆十七年知縣陳遴瑋
延修縣志所著有左氏魯史讀左贅言四書輯略四先生
論宗及五倫分疏武經七書解等書學者稱為孚齋先生

參唐鶴徵府志 鄉評備考 節徐志

王永圖字惟懷無錫顧端文入郡守龍崗施公龍城社見
永圖年纔十四端文稱之曰此凝道之器也許妻以女攜
歸教迪遂以無錫籍補諸生萬曆二十八年領鄉薦甲辰
從端文講學東林書院其為人孝友廉讓一時傾服歷官

刑部員外郎會魏奄以冒功膺封爵同列獻諛者請署名
永圖笑謝曰吾若列名愧元祐石工多矣獨不署崇禎初
晉郎中奉命按奄黨五虎五彪諸獄奏讞無枉撓輿論大
快又按改敕關節二事持論尤平允出守韶州辨冤獄敷
惠政詔人畏愛交至當調以病乞假歸道卒著有儉齋文

集藏於家 參節無錫張夏 雜聞源流錄

儲漑字剛夫改字康夫少為諸生有聲時武進錢一本以
理學為己任漑往受學遂棄舉子業專心求道人多以為
迂獨浙江章正宸一見執弟子禮直指使祁彪佳聞其賢
請見不得欲索所著書薦於朝漑以疾辭乃表其門曰理

重刊皇朝通志卷八
學真儒所著有周易疑義春秋屬比直書四書精義幾希
日記數十卷藏於家生平好靜坐不耐俗紛讀性理至天
地混闢一氣渙然有得自此人我無閒處喧不亂云子秬
字二禾克紹家學著周易集義識者稱之
參徐志
國朝

吳晉剡字錫儒髫年卽慕聖賢之學規行矩步不失尺寸
順治九年登進士授廉州推官訟獄多所平反有重囚囑
吏持厚賄至怒而笞之曰何敢汗我以母憂歸結廬墓側
哀毀骨立遂無仕進意學宗陽明致良知又仿紫陽半日
讀書半日靜坐之法與同邑湯之錡循高忠憲公復七規

砥礪汲引至老不懈康熙十一年邑令史宗堯奉憲檄延
修縣志筆削惟嚴不能爲世家妄作佳傳紈袴子弟多銜
之者乃扁舟遊浙稿未及竣君子惜之
參徐志鄉
評備考

湯之錡字世調安貧力學於書無所不讀尤篤信周子主
靜之說或議其近於禪之錡曰程子見學者靜坐卽嘆其
善學易言齊戒以神明其德靜坐卽古人之齊戒非禪也
性至孝居親喪一循古禮就地寢苦久之受濕致隱疾事
諸父悉體先人志力爲庶叔完配諸昆弟無閒言旣而得
高忠憲復七規喟然曰此其入學之門乎於是一宗其說
爲春秋兩會聞風者不憚數百里來就學焉年二十四遭

甲申之變卽棄舉子業嘗論出處之道曰潛龍勿用潛要確若不確則遯世不見知而悔矣古來多少高明人只爲此一悔所悞郡守駱公請關西李中孚講學毘陵特遣使聘之錡堅辭不赴後延陵書院暨錫山東林亦爭延致之俱不往學校高其行欲舉之錡節孝及門體其意力沮焉錡爲學專務切近絕無緣飾或詢朱陸異同陽明致良知之說則曰顧吾力行何如耳自問較前賢奚若徒多辨論其何益一日抱微疾整襟危坐而逝年六十有二及門金敞梁溪顧培輩建書院於惠山之麓奉其主春秋祀之著有靜坐約言易論偶然吟諸稿

參徐志

補遺

吳鼎字肩之博極羣書弱冠卽有志于聖賢潛心理學受業孚齋王先生門以正心誠意爲務旣壯益自砥礪受業武進薛元臺錢啟新無錫顧涇陽高景逸諸先生門講學問道所得益深養益粹歸與史玉池切劘靡閒玉池創明道書院一時名賢雲集鼎皆與焉造就後進門下駸駸日盛著有四書心見錄四書考壁經考觀省語知非篇莫忘篇蒙養詩醒迷詩篇師門問答切磋日記游藝錄應世稿往答書柬海完詩稿若干卷

明

胡澈字源遠博綜五經尤邃於易大司馬金濂征福建辟之不就

謝惠字迪吉日集里中同志講正誼明道之學敦詩書習俎豆積善不使人知終身非正人不接也唐荆川題其墓曰正誼先生

王彝敘爲諸生時與無錫顧端文齊名友善同邑若史孟麟吳正志張納陞皆出其門嘗偕王別駕升其修邑志後以貢仕爲馬平知縣卒

謝三錫字心乾諸生學以窮理爲先居敬爲主書不本六經四子不樂觀也家貧無擔石儲屏居有穀堂偕門人講道不倦晚舉鄉飲賓

談孺慄字養蒙少穎敏通經術篤志宋儒之學與永定邵維楨霽寰爲道義交晚以布衣主講東林明道書院所至擁篲負笈如雲升堂析疑聞者莫不歎服著有東林講義行世

周濂學字仲瀛原名礪寺瀆里人生平研精理學於宋儒之書靡所不究嘗問道於同邑儲先生剛夫偕遊錫山謁道南祠過訪吳先生素衣華先生訥庵兩先生俱稱之授以真儒一脈二冊曰了此卽可以入道矣濂學受之以歸學問大進明亡後隱居教授以卒所著有易學金針又廣

搜遜國時與難諸臣一百九十六人都為一集顏曰靖獻錄及所為詩稿悉藏於家

國朝

邵贊字幼節永定里人祖維楨字霽寰諸生以學行主講東林明道書院贊工詩文隱居力學與吳門徐侯齋無錫張秋紹同郡魯桐聲為友康熙初郡守駱公鍾麟倡興延陵書院聘究心理學者相與講論贊為祭酒焉著有魁民遺集

萬錦霏字雲倬受業湯之錡為編次其遺書其師一言一行悉記之著湯子庸行錄

重刊宜興縣舊志卷之八

人物志 孝友

周禮教民六行先孝友而孟子謂為良知良能蓋斯二者實本于天性大孝不匱小孝用勞分量雖殊竭誠則一至于蹈水火傷體膚是為愚孝然誠至格神亦不得謂非孝也昆季分形共氣如手與足善體親心何分爾我書云惟孝友于兄弟古人類然自漢迄今並採著于篇彼有滴其天性者覽之可知所感矣

漢

蔣政字景化面亭侯澄第四子性篤孝仕漢為荊州刺史

父歿卜葬都山之陽廬墓三年服闋不忍遠離墓側遂築

室居回圖

參毘陵人品記

許武字季長會稽陽羨人太守第五倫舉為孝廉武欲成二弟晏普名乃析貲為三自取膏腴二弟所得皆瘠產鄉人鄙其貪稱弟克讓後晏普刻勵並得選舉武乃謂宗姍曰向以二弟年少未預榮祿故分財取譏今殖產數倍願

悉推以與弟無所留郡中翕然稱之仕至長樂少府

參漢書王

升舊志

許荆字子張武之孫為郡功曹兄子世嘗報仇殺人怨者操兵攻之荆出跪曰兄祇一子為嗣死即絕滅願殺身代

之怨者扶荆起曰許掾郡中稱賢吾何敢犯遂委去太守黃兢舉孝廉和帝時稍遷桂陽太守嘗行春至耒陽縣有將均兄弟訟財荆嘆曰教化不行咎在太守即上書自劾兄弟感悟各求受罪彬人出外多不養父母因此皆還供養者千有餘人在任十二年召拜諫議大夫卒於官桂陽人為立廟樹碑孫毓靈帝時為太尉今南門外有許將軍

墓

參節漢書王志

宋

蔣恭與兄協同居元嘉中晉陵蔣崇平為劫見擄云與恭妻弟吳晞張偕行捕晞張不獲收恭付獄協列身是戶主

求免弟恭列晞張是婦之親身甘受罪郡上其事以兄弟爭受罪為盛世嘉事並原之乃除協義昭令恭義成令

宋參

書毘陵人品記

許昭先父母老病家無童僕竭力致養鄉黨稱其孝雍州刺史劉直道辟為征魯參軍辭不就叔肇之繫獄七年昭先朝夕餽食貲產既盡鬻宅繼之肇之諸子皆倦怠昭先曾無懈志尚書沈演之嘉其事肇之因得釋補本邑主簿

又固辭

參宋書王志

齊

吳達之嫂亡傭值以葬從弟欽伯以歲饑夫婦被掠賣達

之售田贖之郡辟主簿固遜其兄尚之又以先世遺田讓

弟滄伯弟亦不受棄為閭田建元三年詔表其閭

本南史

陳元子四世同居一門百有七十餘口建元三年大使巡

行天下上其事詔表門閭蠲租賦調役

本齊書王志

唐

蔣冽雲陽侯默之後舉進士歷官尚書左丞父挺卒冽及弟渙廬墓側植松栢千餘株撰蔣氏太宗碑立之漏湖東葛墟村以彰世德時天寶十五載也後之奇之翰以舊碑湮泐用完石重刻之今在湖西冲寂觀前

節唐書

宋

單煦少友愛兄熙嘗殺人至死煦即趨鬪所願代兄受捕

已而死者蘇聞之感嘆遂輟訟按單譜以煦為祥符元年進士歷知昌濮合州皆有

政績累遷至光祿卿但前志失載俟考節單譜葛姓統譜

元

儲炳字伯輝好讀書抗爽有至性元至正戊戌紅巾賊縱

掠臧林炳聞大父被賊傷臂獨身仗劍追賊至東庫轉鬪

移時為賊所害人稱烈孝節儲大文傳

明

黃玘字用明有至性力敦孝行成化十年舉於鄉授廣平

府同知以祖母儲苦節泣告御史徐緯為上聞建坊旌表

奉二親愉愉色養政務寬和吏民愛之丁外內艱後不復

出節內閣中書馮斐墓誌

胡孝字企參成化二十年進士家素貧累官知府而貲產

甚薄性孝友父申成化十年舉人任濮州學正每有譴責

必溫顏婉詞以承之及父卒于官奔喪徒步慟輒仆地哀

動路人尤愛撫諸弟鄉人稱之參王志

張倫兄弟同居倫與季弟新各一子仲亨有四子皆長倫

謂二弟曰吾等老矣子婦各六人同處恐心不一盍析筋

亨曰吾兄弟三人可三分之倫曰不可吾為諸子分非為

兄弟分也若三分之是爾私其子而吾與季私其財也乃

析產為六倫取其下者浙人胡琛為作孝友論贊

參徐階鳳舊志

節張納陞傳

徐琳字廷璽鑑家子幼侍父官刑曹聞祖母病請奉母吳夫人歸省時年十二眾驚異之父以諫北征詔獄琳辭母奔赴母命以婦將婉姑少緩愀然曰吾父有難何敢顧妻子倍道馳至京晝謀餼糧夜顛蒼冥三年乃得釋復始歸父陞瓊州太守卒於官琳迎喪歸葬龍潭山方開壙一虎咆哮至琳拜且泣曰眾為我父供役甯啖我毋傷人虎俛首而去人咸謂孝感所致母病逾年未嘗一日離側撫庶弟及孤姪皆盡其誠嘗欲做范文正置田贍族以長子溥

官京師屬仲子濟經營其事厥後溥得請諸朝建立義莊成先志也以子溥貴封庶子贈少傅

萬士亨字思通吉家子少奉父訓規行矩步不失繩尺善屬文登嘉靖二十年進士時館選限三十五以內享僅長一歲弗肯與試其不欺如此歷官吏部稽勳司郎中奉職勤恪操履清嚴聞父訃水漿不入口者三日捧靈位徒行九十里抵舟哀毀愈切至家無頃刻離柩側戚若負重罪踰五月竟不起遺命以衰經殮家人從之

徐文煜字晉章年十六父歿水漿不入口者累日寢處柩旁繼喪祖母承重致哀婦翁念其孤苦請婚期煜堅辭之

服闋始婚婚未幾葬父廬墓三年手植松楸指血淋漓不
顧後補弟子員應鄉試已進頭場聞母病未畢試馳歸侍
湯藥母卒廬墓如前王文恪邵文莊過訪稱嘆山人沈周
為寫二老願廬圖嘗從唐荆川講學言有不愜辨難至再
三荆川亦心折生平博極羣藝尤潛心理學云

墓誌

參節成國公朱希忠

李延謚字子靜由選貢授龍門令尋改教澱江陞益府教
授居常以父早逝不逮養為恨自號孤山事母孝謹溫恭
至老不衰舉鄉飲賓嘗預修邑志未竟卒

李魁性篤孝父佩得心痛疾魁焚香告天求以身代踰數
月憂懣計無所出聞俗言股肉可療疾乃割股和藥以進
父疾有間未愈也或言蝟可療徧求弗獲一日至東橫橋
忽一蝟突前伏不動魁喜曰此天賜也遂攜歸鼎而羞之
病良已

參節王志

談書字子虞幼孤家貧事母至孝晨昏定省五十餘年未
嘗一日怠母歿每食必奠以此終身為諸生繩尺自檢言
簡行恭士林重之

史元鎮家失火元鎮入火救母萬氏鄰人止之號慟不復
顧母子俱焚死火熄視其屍猶作負母欲出狀巡按題旌
建坊墓道

本徐志

湯鍾壽字簡庵事母至孝母性嚴婉以承之母稍不愉卽長跪不食至老猶然萬曆十六年子兆京舉於鄉報捷時鍾壽方跌坐作靜功課訖方動及兆京爲御史誨之曰言官實心爲國上不比天子中不比宰相下不比僚友傳爲名言以子貴贈監察御史萬曆十七年與修縣志節徐志陳一經字懷古至性純孝生不識父詢得貌繪而事之每誦視輒嗚咽泣下母節蒙旌以館貲佐官鏹建坊年十六有里艾私挑正色拒之後每迂步弗過其門僕人娶婦一經視其舉止端重詰之乃故儒生妻也急遣還不問其直設義塾置義田子于廷克成其志再受封爵而布衣徒步

人不知爲御史父也初從弟一教幼孤撫誨一如于廷每就館兩攜以往館人或難其食則自出館貲以補不逮卒後建特祠於城西南隅御賜增光廟祐額鄉黨私謚曰孝潔先生著有四書大全纂參唐鶴徵府志節徐志楊萬春字永芳家貧篤於孝友撫其孤姪三人長者延師幼者僱姆或勸使長姪力耕可濟貧曰吾子讀詩書而使兄子塗手足吾何忍長姪歿撫其二皆有成焉初萬春父母兄嫂皆死于疫已亦病甚不能送父葬忽夢呂仙授以丹覺而異香在口病霍然乃急趨四十里至隴猶及視窆節徐志

黃表赤字元初幼時就里塾父母以肉羹餉之輒愀然不樂知父母不得食也既為諸生有聲得脯資悉以贍父母天啟四年舉於鄉崇禎初署高郵學正稍積俸金買田數十畝悉以分伯仲曰吾豈先妻子而後兄弟哉歷官南京兵部主事乙酉

大兵破南都被執劫之以刀不動釋之越數日又逮至乃削髮被縑以見知其不可奪終釋之乃遁迹深山中邑人

高其行雖婦豎亦聞而敬之崇祀孝悌祠

參楊懷遠鄉評備考

陳一教字礪雲父儁章歿年未及五十臨終語曰吾雖三子大吾門者汝也兄若弟為吾始終贍養之沒後養其兄

婚其弟悉遵父遺訓萬曆二十九年成進士是年兄歿撫

兄子如己子後弟歿又撫孤使成立子于泰辛未殿試第

一人官修撰鼎革後以隱逸終

吳宗良邑諸生少承父敏行庭訓以名檢自束父疾躬親

湯藥日夜焦勞髮為之枯父卒居喪盡哀思慕終身不懈

腴產盡推與弟不數載典售略盡復贖歸以授諸姪年饑

三黨中貧乏者莫不周給於鰥寡孤獨廢疾者尤加意焉

跡其行事有類素封實不越中人產也

戴朝榮字顯于父早卒母黃氏病危飲藥勿效朝榮哀禱於神夜夢神指其左腹明晨覓猪膽和藥途遇老叟語之

曰汝母病在肝血愈之惟肝血耳語訖忽不見朝榮省悟神指乃焚香入室袒左腹剗以利刃截肝和藥進之母果霍然愈而朝榮創甚不能起謂家人曰卽有不測當云得暴疾慎勿傷吾母心旬日痛少差創亦旋合子母俱享上壽

史君爽字則召七歲喪父哀毀如成人事母孝析產以良田與弟姊卒無子迎葬祭奠以慰母心妻周氏相國延儒女弟相國日益貴君爽泊然若不相涉者妻亦布衣操作自甘淡樸相國每嘆曰吾不難於則召難得吾妹耳壬午秋延儒自京貽以書使其子奕封捧至內有科場秘語君

爽不啟函命取火至焚之君爽幼擅文譽久困諸生中次富序貢謝不赴築室親墓居之以終其身

參徐志

國朝

曹應莘字期社邑諸生少孤事母篤孝崇禎末草寇焚劫應莘負母走寇躡之體中數創血淋漓以身覆母哀泣曰甯殺余求免吾母賊相顧斂刃曰彼孝子也殺之不祥遂舍去母子俱得全

儲寅亮字采疇性孝友適兵至兄患病負之突圍走兵以戈擊兄并中其鼻仆地夜半而甦匍匐十餘里乃免鄰有負逋者將鬻女以償之聞之亟燒券湖客舟覆告急罄家

以濟節儲有
亭傳

許士珍家貧織履爲業母病割股療之及母卒廬墓三年鄰里感其純孝具呈府縣給額旌獎

梁王郎巫者梁應文子居山亭之塘前橋日不知書天性篤孝娶妻方十日而父病日夕侍父病愈乃止應文賽神以黑夜雨中醉歸隔河呼王郎扶我王郎趨赴而父已墮水王郎赴救父子俱溺死七日後屍出猶堅抱其父里人共往視之王郎面如生

邵廷紀父席爲盜所執廷紀懇求釋其父廷紀被焚死妻岳氏年十八守節終身

吳箕字弓武樂邑令永齡仲子也兄雲垂隨父任箕家居侍養祖母徐氏鼎革後永齡家居箕亦絕志進取以養親著書爲事祖母卒母陸氏亦卒廬墓三年喪畢侍父書室寢食不離者十年著春秋明心錄能補傳註所不及兄雲垂卒事寡嫂如母雖盛暑不衣冠不敢見嫂卒兩姪皆孩幼撫之如己出婚配後以初析時產悉歸之遠近咸稱古君子云

湯迪簡字在廷邑庠生天性孝友年十四母卒毀戚如成人父欽止疾虔禱於神疾遂愈念其祖得莘潛德未闡持行狀徧叩紳士輿論允洽呈督學使者勘實祀鄉賢弟孝

廉懋簡析產後業中落復時給之無德色從弟迪朝卒遺孤四齡孀徐守志加意撫卹歷久弗懈又建家廟置祭田報本追遠之思可謂至篤矣

王明俊故明別駕王升族人也叔士章無子立為嗣童年喪母號泣不食士章憐而勸之事後母尤婉曲承順其妻偶忤命即出之士章卒哀毀如母喪時鬻產營葬廬墓三年鄉人萬賢書等感其孝請於當道給額獎之

吳景運字休明文肅公儼元孫也少善屬文工書法順治十六年成進士旋以戶糧奏銷被黜父時舉卒後母周氏年邁不能行值鼎革負母避兵艱瘁萬狀母疾侍湯藥雖穢惡之役必躬親之兄應運鼎運年相若俱能詩善書子

兆龍康熙八年舉人東安知縣錢修期邑之潼渚人家貧年十三即業樵以養父母積貲置屋三間田二畝康熙丁巳四月母疾醫藥不效修期割股和劑母遂瘳八月父疾割股如前及父母終賣田屋以葬傭工自給其至性有過人者

蔣廉字彝伯因父病篤禱於神願以身代藥餌罔效遂割股以進父乃愈後父歿居喪號慟哀感路人宗黨共推其孝郡司馬蔡如葵邑侯石確俱給額旌獎

史泓字善長太常卿孟麟家孫也早喪母弱冠遊庠旋丁

以上參節徐志

重刊宜興縣志 卷八
父艱哀毀骨立服闋卽走京師爲祖籲請贈卹鞠育一弟
一妹以婚以嫁家居謹守先業吟詩作文無閒寒暑子陸
輿康熙十一年解元十八年進士授翰林院庶吉士泓益
加謙抑宗黨睚眦毫無芥蒂杜門不出惟以訓子孫爲務
壽七十九終

吳玫字聖石諸生生八月而孤性至孝事寡母曲體其志
姊貧母憐之出所遺財產器用均給之

許翎諸生少工文篤孝友叔肇篋遺孤翎家貧不能讀書
翎令與子泉同學自督課之所課未竟則撻泉以愧翎翎
跪泣不敢仰視長力學有名

李舒春字惠若有至性兄早卒事嫂如母撫姪如子終身
無閒言以康熙三十八年舉於鄉任句容教諭

王人瓏字組卣以歲貢任沛縣訓導幼侍父疾爲之嘗糞
居喪哀毀骨立三年未嘗入內家貧授徒于外節假歸侍
母終夜遺之不去論之再四乃一內寢與弟升卣友愛無
間儲在陸稱其文品在二韓閒行誼在二王閒二韓唐昌
黎 本朝慕廬二王隋文中子同族孚齋也

萬迅字叔翰士和曾孫性篤孝父卒哀毀骨立三年不踰
喪次母病亟羣醫斂手迅集方泣禱于神進藥立愈忌日
輒麻衣衰絰坐蒲團者一晝夜弟爲怨家所陷殫貲營救

宛卒曰舅氏貧乏待以舉爨者四十年伯兄兄子相繼卒
三孫皆幼籍其貲經畫十餘年孫成立而後反之絲粟不
漏一日拏舟往拜祖祠返命家人滌簣爇香訖偃臥而逝
卒年六十九子夔輔歲貢士工詞翰孫松齡別有傳

蔣正泰少孤刈薪為業兄弟分爨以養母兄卒遺一子一
女母欲令嫂轉適正泰曰嫂能守志吾養之無憾得米供
母嫂而後及其妻子兄子長為之延師而已子負薪不輟
路念祖字敬止以國學生考授州司馬性至孝母潘恭人
疾再剜股肉以進工詩古文詞有耐庵集行世

蔣春字景文邑諸生母病急剜股以進撫弟姪最友愛初

事同邑湯世調研精理學後師同郡金閻齋嘗贈勉學詩
三章教以存理祛欲之要性嗜書凡藏書之家靡不游坊
肆之間有未見書輒傾囊售之所為詩古文高堅凝雅著
有練溪草堂集

柳友德字之仁年十九其父病亟友德計無所出思股肉
可療遂割一臠以進病不減自咎不誠乃入拜神祠復割
一臠和藥進父病竟愈

宗士成字于玉性孝友父抱危疾割左股和藥以進母病
又割其右股晚年與諸弟同爨妯娌偶有違言即跪母前
涕泣請自責邑侯趙旌其孝友卒年八十殮時見其刀痕

者咸為涕泣

萬鑑字金益家貧事母至孝甘旨無缺值歲饑母于後園得苾根為粉曝日中鑑見之曰吾不能具饘粥使母及此一慟幾絕弟有篤疾不瘳鑑念弟死則傷母心乃禱于神求減己壽私割股以療弟母死三年不御酒肉不入內有族婦死貧無以殮解衣與之僅畱短衫里有婁人死謀有以贈之不得入室中摩戛十指妻解其意曰吾惟一簪知君欲得此可持去以孫中道成進士追贈奉直大夫

吳徵字雲徵諸生家貧事父母至孝年二十父母繼歿益窮窘至不能舉火有二弟尚幼拮据盡瘁以教以育後家

業稍裕分析時悉以膏腴與弟邑令李先榮給孝友性成額旌之

湯咸亨字培庵雍正二年舉人讀書日默記數千言經史百家靡不蒐覽性友愛父歿兩弟求析爨咸亨從之後復求合又從之授徒于外修脯所入毫釐不自私甘苦共嘗衣裳屣履取其敝者終其身人無間言

補遺

儲昌字伯隆母歿柩在堂比鄰失火延燒及昌室昌撫柩號慟誓以身殉頓反風火熄其仲子笙性篤孝七歲喪父廬墓三年白鵲巢墓人謂孝感所致

徐濟字時望文靖同母弟幼明敏讀書強記性孝友父染危疾莫能治濟夢神授一方既覺依方服之卽瘥人以為誠孝所感弟得心疾家人莫敢近濟日夜在側百方治療然後愈晚好讀醫書蓄善藥病者多所全活鄉黨或以貧乏告悉周之力贊文靖遵先人遺命置義田以贍族既得請于朝濟力任其事為善後計族人至今賴之

張邦穀字天字僉事述古幼子父歿年止十二從兩兄邦祥邦瑞自力于學遭生母喪三載廬墓時縣尹王鈴司訓應綱皆旌其廬宏治戊午由書算中式順天舉人仕萬載知縣有善政

鄒善祐父某居鄉鯁直嘉靖甲寅倭寇竊發仇家乘亂報復持刀劫殺善祐年十五急前格鬪奪刀救父十指盡斷父子遇害邑侯董公悲其死孝為詩弔之云鄒童信不愧汪童死孝由來卽死忠雙腕奪刀甯斷指丹心報父卽穿胸

楊暉萼字常吉庠生少師堵文襄公文襄卒潯州聞訃悲號行心喪禮明季隨父避兵遊騎突至以刃刺父暉萼與弟渭抱持爭以身代兵意動父乘閒得脫渭竟被害暉萼斃而復甦渭庠生文辭豪邁以少年代父捐軀所著多逸周繼思母死廬墓三載

張應鵬字子賢萬曆乙巳父母相繼死應鵬年幾五十廬墓三載每至夜有白蛇長數丈環繞廬外一切鬼魅毒物不能侵邑人毛士龍輩作詩以贈多至數百首有司上其狀詔賜冠帶給額旌門

周昌汝字景全膂力絕人五歲喪父母改適又寡無所依昌汝迎歸孝養母禱于茅山至半嶺虎突出拽母去昌汝急掣虎尾撲傷額騰身騎虎背持石卵碎其眼會有持挺救者虎始釋母去未幾氣絕昌汝負屍歸葬每道及輒流涕

蔣允化字龍伯宏憲子生而穎異五歲能屬對擗管爲文卽與名士爭壇席萬曆癸卯雋京兆試時父宏憲以部郎差辦潞河工役允化代父日夜經畫勞動成疾旋以兩親繼歿哀悼而卒

潘良鼎字如愚母病刲股撫孤姪如子捐米賑饑捐地掩骼解囊修橋族人婚喪不給者助之子瀛選順治五年進士授中書舍人良鼎贈如其官

路文軌上舍生母蔣恭人喪廬墓三年侍父雲龍疾衣不解帶者數月撫庶弟文輓同寢處教養成立卒爲營喪殯人稱孝友焉

萬人儒字雍伯庠生季弟人佐字應生士亨曾孫胥有至

性鄧秉貞慕其孝友訂交焉母病同侍湯藥不解帶者數月祈以身代母歿人佐告兄曰母死安用生爲相抱哀號兩人遂大慟而絕聞者哀之

任億年字世餘一字少懷事繼母以孝稱母年八十餘億年亦六旬老矣而孝謹不替視異母諸弟不啻同母弟也

崇祀孝悌祠

任友恭字希安一字肅吾毫陽人事親孝居喪哀毀晨起焚香主前有事必告過則拜跪自責終其身如初喪時敬事孀嫂兄樞未舉飲食必薦弟姪中有好學者重禮之爲厚給其試費鄉曲有善舉必與焉崇祀孝悌祠

徐安世字明倩諸生父廷錫以長子儀世貴受封魏璫用事令其黨崔文昇督漕江南陰害縉紳家廷錫爲所羅織緹騎逮捕安世泣謂父曰大人老矣奈何遠行且邇者魏璫擅權士大夫俱被刑戮而伯兄久爲羣小側目大人往必不免兒請以身代死生聽之安世抵淮文昇兀坐詰責安世反覆抗辨不屈文昇怒杖斃之家人昇尸出遇一黃冠熟視之曰死者可復生也取袖中藥末置創處遂甦黃冠倏不見而文昇謂安世已死事得解邑人咸稱爲孝子云

儲銘字景新臧林里人洪武時長兄鏞以糧長督造運船
逾限當遠戍銘涕泣前曰銘藐爾遺孤獲成立者兩兄力
也兩兄業備履艱險奈何不少分憂患乎且攝服家眾整
齊內外銘不如伯幹略精敏協理羣務銘不如仲若荷戈
輸作銘幸當丁壯請從此辭兩兄爭赴久之銘卒往凡十
年乃歸

蹇仁字輔之年二十一而孤上事祖父母下撫二弟成立
年至四十諸弟勸之娶婦仁曰倘娶不賢婦聞吾兄弟吾
何以堪俟二弟歷練老成析居而娶未爲晚也終不娶而
卒

杭奎淮子有孝行能詩頗得父風選授布政司都事

徐陞字尙可增廣太學生父文煜以理學文章重於時卒
祀本邑孝弟祠陞生而孝友率諸弟繼承前緒行日修學
日進父歿既卜葬於南山之圍塢諸弟以形家言將不利
於陞請改卜陞奮然曰果係佳城葬者藏也弟姪昌吾志
慊矣諸弟泣諫不聽卒葬之陞後果無子及將卒遺命以
產分授諸姪且令兩弟無以姪後我恐如形家言不利也
陞既卒兩弟各令一孫爲之後至今繁衍時有登甲乙榜
者

萬士安字思遷少承父訓以踐履篤實爲學既長師事唐

荆川荆川愛其清約謹厚每以寡過稱之晚以應貢入都卒於弟士和官舍

許鎔萬曆時人父得危疾而貧不能延醫鎔年十二嘗聞古人有割股療親事因閉密室割股肉以進父飲之而愈李齊字希賢萬曆時人將赴提學道試而母得疾齊謝同學將不往母促之力因默禱於竈神割股和藥以進疾少間往試得雋比覆試而訃適至齊卽奔喪以臨點不到被黜聞者莫不稱之丁燠丁燠大儒里人黃公立上黃里人陳壽章字子仁亳村里人前後以母疾醫藥不效割股以療之

毛伯昌字文卿弟伯晟字益卿居喪廬墓三年邑侯給額旌之

楊曰涓字民質諸生母疾嘗割股以進繼母疾復然先世所遺資略取薄產餘盡以與弟當事以聞巡撫提學其題獎之

徐先枝字青回諸生性孝友嗜學能文乙酉兵亂有劫其仲兄去者先枝奮不顧身入賊巢請代賊義而兩釋之

張啟孝字完敬子方仁字仲恒張渚鎮人俱割股療親其先有自勵者字心敏孝事二親亦嘗割股又有允德者字文典母病無力延醫乃嚙股進之二親卒後以父嘗有武

當進香之願乃壞其家子身走千餘里凡兩載始歸
國朝

楊灋露字惠侯萬春子承父家學篤於孝行事繼母能得
其歡心課徒所入悉以奉母同里湯世調甚推重之

杭伊蒿字凌霄分水墩里人少失父穎敏好學孝友孚於
族黨母歿寢苫枕塊廬墓三年

楊宣猷字惠侯諸生與兄爾猷俱以孝聞明季爾猷死於
兵宣猷事父疾躬親湯藥十餘年不倦撫姪如子教誨成
人鄉黨咸推孝友焉

屠元孝字振之父國鏡明季禦土寇死元孝年甫十五號
泣尋父屍三日始得之於無相庵西河負之而歸葬之祖
塋之側

陳枝先厚和里人其兄彙卿素工技擊巨盜張三剽掠湖
濱惡衿邱某陰導盜夜率徒攻陳氏居彙卿力鬪幾獲盜
會他盜踵至遇害枝先持兄血衣奔控當道崎嶇五載卒
使羣盜授首邱某伏辜乃設奠以告兄靈曰弟所報兄者
惟是矣

朱華袞艾墅里人家貧歲歉父將鬻其妻時華袞甫數齡
耳泣不能捨族人三省資以數金得不鬻既而金盡貧益
甚卒鬻之華袞哀慟不已然無可奈何居數歲華袞年十

三矣日夜念母不置因跋涉數百里遍訪得母所在貨銀贖母以歸然終以尋母勞瘁得疾殤

許樹偉字漢節以兄樹遠死國難遂絕意進取父以逋賦獲罪樹偉身代之事解恣情詩酒終焉

徐龍詔字化明事親孝父疾急割股和藥進父歿哀痛欲絕遭母喪亦如之愛弟終身無私積里黨為非者畏其知多斂跡子邦楨自有傳

周詠字恒子雲霽里人明季兄某以忤勢豪陷獄詠盡廢所授產救之勢豪怒將并陷詠族人咸奮曰彼敢害詠所不合族仇之者非人勢豪乃止姪某累荒糧匿詠家里胥

誘致詠子而使謂詠曰爾無虞爾姪朝以出子夕以歸矣詠曰兄唯一子奈何出之蹈不測因重費求直其事凡三年事始定卒不出姪詠子亦無恙也

堵景源明閣臣允錫嗣子允錫及子世明俱死於楚樞遷徙無常及允錫妻陳氏撫景源為子始發憤往迎聞樞在衡州也而比至衡州樞又為人移動及遇故友徽人葉子文始得之騎龍庵中并得允錫疏稿及詩集以歸其沿途助贖者則有楊如容盧子瀛陳立之其偕行者則有景源甥殷周賓其助葬者則有張有譽薛嘉祉往返凡暮月云

盧素林字右倫生而喪父病跛業縫衣傭業於外若離家

孝友補遺

近日必數四歸視其母母老病瘕侍飲食滌廁踰終日不
于無少休年垂七十述其母苦節猶涕泗交頤不止里人
呼爲孝子盧成衣

徐人龍字自牧家貧有至性篤學能自刻苦以底於成父
煜先嘗疾甚人龍剗臂肉雜藥餌以進獲瘳曝其肉藏之
逾年父復疾仍以此肉進而愈初爲舉子業年四十後遂
絕意科舉授經自食門下多窮經實踐之士人亦以是得
見人龍之學也

莊聖躋字心一邑東莊家橋里人少力田以養親晨夕甘
旨必備及歿哀毀盡禮廬墓二十五月痛親不可見齋宿
城隍神廟夢中恍惚見親因刻木像朝夕供奉如丁蘭故
事終其身班令君聯田少府多稼額旌之曰至誠感神江
學博勺楠手書孝思維則額懸其家廟焉

陳其復字見心念祖子嘗隻身萬里至奉天府求祖母骸
告於執政給牒扶喪而歸盛京尹廖公騰奎爲作孝孫傳
書曲體親心四字贈之

張翼運字偉績五歲而孤母周苦節撫之成立長入武庠
母卒寢苦塊三年不飲酒茹葷內外衣必麻日誦金剛經
於母靈前或戲之曰三年內若生子奈何答曰若然非張
某子矣其人慚服

閔佐成世業農目不知書卅角時卽代孀母勞勩母歿時
佐成年已五十結廬墓旁焚香誦金剛經爲父母祈冥福
所居名李家圩

蔣庠復字天序永脩子以貢生選授蒙城學博力辭弗受
父疾刲股以進焚香籲天願以身代及卒哀感行路居嘗
修橋梁恤鄰里收棄兒暑施帳寒施衣疾病施道藥殮施
榘歲以爲常

王九齡北鄉人客作於高堤沈氏同兄佃田以奉瞽母母
起溺則爲抱持母死哭不絕聲所親或慰之九齡曰母在
吾扶掖之今死吾何以生爲數日後卒縊死

吳上璆字美卿毫村里人與其族名維垠字元參者俱以
刲股療親而大儒里丁詠暉丁宜盛丁榮上黃里黃養潤
廟橋里王裕仁澄潭里蔣遜宗蔣元溪社瀆里黃天俊前
後俱以刲股療親聞於時

陳貞慶字聖基毫村里人性孝友嘗刲股療親病與兄同
居數十年無間言其族書賢字殿祿事母孝母疾刲股同
里吳選字九齡亦以刲股聞

沈瑜德字致美西餘里人生二歲而孤事母孝未嘗一日
離左右嘗刲股療母疾爲母具呈請旌人咸稱之
何世鯨字允化事父母飲食衣服必躬親之不假手於人

重刊宜興縣志卷之八
父疾革兩割股肉以進及歿哀毀骨立服闋日誦蓼莪詩
數過因自號曰景蓼云

重刊宜興縣志卷之八

人物志 文苑

立言居不朽之三燕許文章韓歐碑版輝映一時流傳
奕世洵不朽盛事哉乃至鄉曲之士聲震藝林雄文傳
誦雖窮達殊途其爲不朽一也陽羨溪山明秀孕靈毓
奇文人韻士絡繹挺生於其際元圃積玉無非夜光美
斯愛愛斯傳彙而書之於以見宜邑人文之盛錄文苑

唐

許景先真定公緒曾孫舉進士神龍間獻報慈閣賦李迥
秀讀之驚異嘆曰是宜付太史中茂材異等歷殿中侍御

史按劾不避權近尋知制誥張說稱之曰許舍人之文詞
 旨豐美得中和之氣開元十年伊汝溢壞廬舍甚眾景先
 言於侍中源乾曜得旨令持節賑贍帝自擇刺史十一人
 景先由吏部侍郎治虢州詔御史以上祖餞帝賜詩命高
 力士給紙筆令自賦資絹三千疋後徙岐州人為吏部侍
 郎著有訓誥集八卷

節唐書

蔣乂字德源集賢殿學士將明子性銳敏過目不忘博綜
 羣集有史才時集賢殿書籍殫將明奏請引乂助力整
 理料次踰年各以部分得閱善書二萬卷貞元初為起居
 舍人轉司勳員外郎皆兼史職帝嘗登凌烟閣視左壁題

文剝落問宰相無知者以問乂對曰此聖歷中侍臣圖贊
 口誦不失一字帝嘆曰雖虞世南默寫列女傳不是過也
 又問神策軍建置本末條據甚詳宰相高郢鄭珣瑜嘆曰
 集賢有人矣明日詔兼判集賢院事父子為學士儒者榮
 之後遷兵部郎中與許孟容韋貫之刪定制敕三十卷為
 開元格改秘書少監復兼史館修撰與獨孤郁韋處厚修
 德宗實錄以勞遷諫議大夫耿介自持嘗疏裴延齡罪惡
 又拒王叔文不與交世益高之後封義興縣公又束髮志
 學老而不倦雖甚寒暑卷不釋故能通曉百家尤明前代
 沿革家藏書至萬五千卷子五人係伸偕僊佶並位刺史

而係伸偕尤知名又所著有大唐宰輔錄七十卷建中實錄凌煙功臣秦府十八學士史臣等傳四十卷

蔣係字大中又長子善屬文得父典實太和中拜史館修撰與沈傳師李漢等參修憲宗實錄轉右補闕宋申錫被誣文宗怒甚係與崔元亮涕泣苦爭申錫得不死轉工禮兵三部郎中皆兼史職後轉諫議大夫宰相李德裕惡李漢以係爲漢姻姪出爲觀察使復貶唐州刺史宣宗立召爲集賢院學士轉吏部侍郎懿宗初檢校尚書右僕射封淮陽郡公子曙字耀之舉進士歷官起居郎著有憲宗實錄四十卷

蔣伸字大直又次子舉進士由右補闕爲修撰歷翰林學士承旨宣宗雅重之見必咨天下得失伸言比爵賞稍易人且偷帝愕然曰偷則亂矣伸曰非必遽亂但人有覬心亂由是生帝嗟嘆拜同平章事懿宗朝命監修國史封安樂縣公食邑二千戶

蔣偕字大化又第三子歷官史館修撰與崔龜從續撰大歷以來唐歷累遷太常少卿大中時復與盧耽等撰次文宗實錄三代踵修國史世稱良筆著有文宗實錄四十卷續唐歷二十二卷編次李絳論事集二卷以上參節唐書蔣防字如城年十八父誠令作秋河賦援筆立就其警句

云連雲梯以迴立跨星橋而徑渡于簡遂妻以女李紳命
賦講上鷹詩云幾欲高飛天上去何人爲解綠絲縹紳識
其意薦之朝歷官翰林學士中書舍人著有中書詩賦集
二卷

喻鳧昭唐時以能詩名舉進士爲烏程令姚合有送喻鳧
校書歸陽羨詩云主人庭葉黑詩彙更誰書闕下科名出
鄉中賦籍除山春烟樹眾江晚遠帆疎吾亦家吳者無因
到敝廬以上參王
并舊志

南唐 蔣凝字潤涵姿容如玉敏哲過人天成中爲侍讀學士文

思瞻麗朝中號爲玉筍班參毘陵
人品記

宋

蔣璨舊志誤
作燦字宣卿父之美早卒璨方十三歲鞠於世父

魏公之奇博覽載籍操筆成章尤善爲詩魏公器重之賦
詩曰渥洼之駒必汗血青雲之幹飽霜雪以魏公蔭補將
仕郎歷知平江臨安二府嘗與轉運司計料開濟常熟十
四浦以通江後以侍郎守臨川告歸卒贈正議大夫孫覲
稱其詩奇麗清婉咀嚼有味如啖蔗然讀之惟恐盡其擬
東坡作置蘇集中殆不可辨所著有景坡堂詩集十卷節
鴻

單錫字君賜世居邑東南鄉湖汶嘉祐二年進士明陰陽圖緯星歷諸書無不該貫嘗修宜興風土記傳於世與蘇軾爲同年進士軾愛其賢以女兒之子妻之來宜興每寓其家

單鏐字季隱錫之弟嘉祐四年進士博學明經嘗乘小舟遍歷蘇常湖三州水道經二十年一溝一瀆無不周覽著吳中水利書蘇軾錄進於朝不果行遂隱不仕李公擇誌其墓云才不竟於所用命不副於所學後夏原吉疏吳江水門周忱修築溧陽二壩皆如鏐所著書其裔孫有明經諱旻者嘗梓其書行世子子發舉八行科登政和五年進

士著有續風土記以上參王志

余中字行老幼穎悟熙甯五年偕兄貫試禮部中預選而貫黜請自黜以薦兄有司雖不許士論嘉之次年魁廷對是科邵剛試禮部第一邵材試開封第一一邑三魁天下傳爲盛事紹聖二年使遼舊志作使金按史紹聖開金尚未立國應作遼還奏河朔城隍墜地乞從密院行下葺治以戒不虞靖康間金人長驅入寇城守多不固始思其言以諫行新法忤旨謫雲川守致仕參徐志

元

王天覺字師尹宋王審琦之後稽古嗜學以文藝知名元

初與趙孟頫鄧文原卒應龍相友善薦為儒官仕至蘭溪
州判詩文不事雕鏤雅會天趣有覺軒集十卷及卒鄧為
撰墓碑趙為書石嘗築別墅於梅林曰覺老山居因葬焉
長子日宣博學嗜古凡三代兩漢彝鼎之器皆能鑒識次
子日新三子日晉俱善詩文儻尚氣節本志
許應祁字芳所舉明經茂異善古文為儒官歷歙縣主簿
山陰知縣致仕有松軒文集行於世本郡志
明
姚臨字大臨嘗曾孫明敏好學淹貫經籍工吟咏洪武初
徵為萊州府同知陞保定府知府卒於官

儲可求名季德以字行幼穎悟年十五能文及長潛心理

學洪武初察舉任本縣訓導累官禮部侍郎所著有五松

清響集參徐志節 毘陵人品記

儲惟德字希崇有文名洪武初太祖微行至臧林時夜將

半聞誦書聲喜甚扣扉入問知其為秀才賜儒籍除充常

州府學教授轉國子監兼東宮說書嘗預修春秋本末參節

儲氏
家乘

馬治字孝常少好學精通經史為詩文典雅冲澹善行書

洪武初舉秀才仕至建昌府同知與周砥諸人友善有荆

南倡和詩集海漁集六卷參王志

文苑
旨

重刊宜興縣志 卷八 文苑
芮畿字惟瞻天資絕人讀書過目成誦遊鄉校時執友邵
賢戲令暗中摸碑錄其文驗之果不誤一字爲文豪邁俊
逸尤喜得酒頃刻立就登成化二年進士官刑科給事中
多所論列有聲青瑣弟稷字惟馨亦登進士官兵科昆季
並列黃門一時稱盛

邵賢字用之幼穎敏日記數千言成化壬辰廷試擬第一
人主司病其對策太直置二甲首授武庫司主事歷遷山
東副使兩秉文銓宏治九年告歸構堂城東扁曰娛晚與
同邑投老諸公十二人觴咏其間十二人者推官萬盛府
經何釗知府李廷芝布政參議翁信侍讀吳經侍郎沈暉

通政王玉布政李雲知府胡孝知州胡連知縣楊琛王鏊
爲之記

李杲字孟寅父震邃經學尤精時藝成化八年進士授兵
部主事卒於官杲爲人方嚴好古學詩思清雅舉正德六
年進士授南考功補北戶部主事卒

邵珪字文敬成化五年進士授戶部主事累官嚴州知府
性穎拔不羣爲詩文多藻思尤善草書小楷得晉唐人筆
意嘗得半江帆影落尊前之句殊自喜因號半江有半江
集六卷行世一時李東陽程敏政皆詩社中契友

卜同字從大成化十一年進士生而才敏鄉舉禮部皆第

重刊宜興縣志 卷八
二人累官湖廣僉憲偕同僚宴集黃鶴樓憲長屬同爲黃
鶴樓賦席閒援筆洒洒千餘言出如泉湧滿座奇之所著
有毅齋集

杭濂字道卿淮之弟天資秀穎然志向高古不屑爲時俗
對偶之文嘗受業丁玉夫授易遊吳中與都元敬祝希哲
唐子畏文徵明友詩文日益工然竟以諸生老卒後文徵
明爲序其遺稿

吳仕字克學幼警穎長尤嗜學登正德九年進士初授戶
部主事累遷山西福建廣西河南四省提學副使中州八
閩人材地也預決魁元十不失一人服其藻鑑陞四川參

政引疾致仕家居吟誦不輟著有頤山詩稿仕年六十無
子或勸以家財之半行種德十二事仕欣然次第行之果
得二子驛敦復舉人孫士貞曾孫炳皆爲名臣
陸萬里成化二十年進士任章邱知縣有史學所著有國
史舉領嘉靖甲午書成自爲序

吳性字定甫北渠里人弱冠遊郡庠文名籍甚由選貢領
鄉薦徙居武進故又稱洗馬橋吳氏登嘉靖十四年進士
乞就教職歷官尙寶司丞致仕家居著讀禮備忘二卷其
奉先之孝教家之法事事可矜式子可行字子言嘉靖癸
丑進士選翰林院庶吉士授檢討賜一品服出使琉球歸

致仕家居教訓子弟文章老而益工次子中行自有傳中
 行次子亮字采于萬曆辛丑進士官大理少卿剛直有父
 風彈劾不避權貴亮弟奕萬曆庚戌進士龍溪知縣宗元
 字又于萬曆戊戌進士湖廣右布政使所至有政聲襄字
 服于原名曹萬曆癸卯舉人福建南平知縣縣有大蛇為
 怪終襄任不出人謂正氣足以勝之終直隸滄州知州性
 後以孫宗達貴贈杜國少傅建極殿大學士
 趙天錫字範于少年遊校試輒冠軍由拔貢中萬曆四年
 舉人選授吳縣教諭陞北雍學正病卒為人篤孝友尚忠
 信名諫文壇傾動州郡宜邑士大夫出其門者以什伯計

主國山大社講學於明道書院著有寫心篇明性正字等
 書行世

沈敕字克寅工部侍郎暉從子也嘉靖十五年選貢任江
 西布政司都事謝病歸杜門讀古輯有荆溪外紀二十五
 卷自漢唐以來詩文傳記軼事異聞搜羅殆盡真州李文
 為之序

周正儒原名肖儒崇禎十三年進士兄延儒及第登政府
 正儒絕不作貴介氣潛心讀書文譽籍甚所著有社集矣

吟卽山軒稿以上參徐志

許有穀字子仁王別駕升之婿以博雅為名諸生著有忠

貞合璧凡所見聞忠臣節婦佳話各賦一詩以紀其事上
司行部採風有司必以此書呈送萬曆己丑王別駕修邑
志有穀嘗贊成之

參鄉評
備考

徐顯卿字公望原籍蘇州人以弟顯宰死非命仇不其國
徙居宜興隆慶二年成進士授編修充經筵日講官啟沃
諄切天子為動容傾聽累陞吏部右侍郎請告奉溫綸馳
驛歸創建義倉捐金五百為倡地方有利病條請必力非
公事未嘗以寸牘干郡縣撰詩文多自出機軸典雅超雋
所著天遠樓集二十六卷

蔣如奇字盤初萬曆四十四年進士初選部曹出守廣信

屢轉東兗道值大旱祈雨泰山因登日觀峯憩五大夫松
下作岱遊記謁孔林輯闕里志時有島兵自遼海寇山左
如奇親甲冑嚴守禦梟賊首戚化田等擒斬四十七人賊
黨遂散以母老陳情歸養邑縉紳有豪橫者激南劉民變
如奇素長厚服眾心出為排解亂乃定書法與董文敏齊
名有淨雲枝帖六種行世家居十年撫按交薦起補湖西
道轉浙江參政督糧入京卒贈光祿寺卿劉狀元同升稱
其馭歷中外清風雅韻所至見思雅好登臨每遇佳山水
輒有吟咏詩格清蒼古秀能自成家著有詠風堂漫記
吳國華字以文工詞翰崇禎七年進士殿試第二人授編

修克經筵日講官侍懷宗講席敷陳洞達遂蒙眷注旋奉命封趙藩壬午典試浙江拔名士黃濤王自超等數十人陞國子司業懷宗臨雍賜蟒服命代行釋菜禮召對剴切有古大臣風請旌祖母沈氏節烈復請假歸葬親皆奉俞旨賜建坊祭葬時人榮之生平贍貧賙急大度好施不見德色官終右春坊右諭德

路朝陽字于葵祖文輓博學能文數奇不遇陳于廷撰墓銘稱其貴遊之習俱盡道德之實闇然朝陽穎敏工文崇禎十三年成進士時初命舉子二三場兼武經書算習騎射朝陽試高等一時稱全才授留都主政遷內閣早卒士

林咸爲惋惜

儲國祚字忝鞠萬厯乙卯貢京師試于廷擢第一元輔葉向高遣子弟列門下擬署京學教授辭弗就少時資魯鈍書案去一足支以石欲睡案翻輒驚起卒成名士爲儲氏文學開先

堵應畿字武卿少而敦敏長以能文稱由歲貢任崑山訓導品行清嚴督率匪懈士子深感悅之陞山東觀城令以廉潔自持稱爲古之遺愛遷王府審理不就而歸

吳淑字艾夫少好學家多積書愛吟咏由進士授蕭山知縣尋擢御史以論昭德宮杖謫德陽縣丞陞衢州府同知

重刊宜興縣志 卷八
轉按察司僉事卒

以上參徐志

許肇錄字圖遠邑諸生父際昌萬曆癸卯舉人才學淵懿有會真館課奮翮齋集宗伯張鼐徵君陳繼儒亟稱之肇錄幼承家學借弟肇箕肇篋相切劘著雙劍集伴騷集問天集味外集行世肇篋子翻勤學有名著有硯吾遺稿吳仲立字仲侯爲詩幽澹閒適有自得之趣著有仲侯山人遺稿吳退貽負氣自豪落筆數百言立就其詩涵演馳驟不名一體著有退貽詩集周漢石文思沉深每有作輒引被蒙頭竟日卧起則振筆疾書出語驚人著有穀城遺稿

節邵子湘集

儲懋時字翼子崇禎甲申序貢淹貫羣籍著述等身在陸受經門下得其訓指晚邁風疾置筆硯牀褥閒默寫二十一史勒成編年紀傳二書加以論斷其他評閱子史靡不精粹子福宗工詩詞著嶽隱詞草選輯家多採錄焉

參在陸文集

國朝

陳維崧字其年明少保子廷之孫康熙十八年特試博學宏詞大學士宋德宜以維崧名聞召試璇璣玉衡賦中選授翰林院檢討纂修明史居官勤慎稱職頻蒙宴賚貌清臞多鬚海內號爲陳髯順治九年蘇常四郡興同聲社名

士畢集觴酌未引維崧索筆賦詩數十韻用六朝體作序
頃刻千言鉅麗無比諸名士驚以爲神年三十不遇因束
裝爲汗漫遊所至諸貴人爭客之性落拓視錢帛如糞土
每出遊餽遺隨手盡空囊而歸亟命質衣物供食用及無
可質輒復遊率以爲常日手一卷書所歷檣危馬駭呻吟
自若視諸弟甚友愛遇親朋溫溫若訥生平無疾言遽色
得官後妻卒于家悼痛不已未幾卒於京邸諸公卿助以
殮歸葬毫村所著有湖海樓集四十二卷詩馳驟李杜閒
詞尤凌厲光怪變化若神富至千八百首俳體有檢討四
六十二卷又有兩晉南北集珍未疾時屢欲告歸以史局

未竣不敢請疾革吟斷句云山鳥山花是故人猶振手作
推敲勢年五十八以亡弟維崧之子爲嗣

黃琦字惺儒進庠後教授生徒著易經講義詩古文二卷
邑令駱天閑季考屢取冠軍曰此雞羣一鶴也

儲方榮字令元順治丙戌舉人詩才凌厲工書畫人多購
之雜著文暨經義尤拔出振奇蕩采一變顏蘅習在陸井

涇清源俱嗣興著有駿坡文集

節存研樓集

任繩隗字青際幼穎悟年十五遊庠文名甚噪順治十四
年登賢書辛丑以戶糧奏銷不得試春官乃肆力墳典殫
心著述書法亦端勁深得黃庭經樂毅論筆意所著有直

木齋集行世

史紀夏字大音以制藝擅場後學多遊其門順治十二年成進士授江西安仁知縣濱江負山以多盜坐黜歸橐蕭然仍授經著書性嗜酒每飲酣興發狂歌時曲詼諧玩世或以晉人風流目之所著有尚書翼註論孟臆解等編藏

於家 以上參節徐志

吳梅鼎一名斐字天篆郎襄兵備道正己之孫未弱冠而孤事祖母及母孝養備至工詩詞善書法精畫山水翎毛與兄天石並稱一時著有醉墨山房賦稿詞稿行世 參吳氏譜任元祥字玉谷明季諸生鼎革後棄之秉性端方篤於孝

友平生寡言笑及作詩文下筆千言立就四方名士多樂與之遊著有鳴鶴堂文集十卷詩集十卷

周廷求字近于諸生鼎革後絕意舉業數十年足不入市扁戶著書凡歷數星象靡不通曉有契友晚年乏嗣嘗買妾贈之所著有春秋二十編易經天獻詩經大成二十一史纂諸書行世

許昌國字一清歲貢生與溧陽潘天成一友善遊湯默齋門習濂溪主靜之學文名噪一時著有薪想集行世毛元策字裴明崇禎十五年舉人有文名選旌德教諭造就有方著有五先齋文集

萬彥字我惟順治十七年進士生而穎異弱冠博涉經史
爲文有根柢甫釋褐以逋賦案黜官遂遊歷東南探禹穴
涉武夷反棹西江匡廬彭蠡諸名勝無不到以故識彌朗
學彌邃而文亦日益工坦然不設城府族黨有匱乏者周
恤備至父石居好吟咏嘗著閒閒吟時已年邁每花晨月
夕攜杖相隨捧觴以進賡歌佳句以娛老云子申祺另傳
徐翹鳳字聲岐天資敏異經史百家無不通貫工詩詞斗
酒後數千言立就同邑許豈凡黃珍伯陳其年咸推其才
氣奇崛視兄喈鳳殆有過之年近強仕絕意進取乃築我
園籩亭以自娛自號籩亭老農著有詩詞行世族弟見龍

字文升性坦直無城府弱冠能文邑中先達咸以大器目
之應試輒抑于有司遂廢業寓情詩酒

任培元教授後學奉朱子小學爲準繩嘗言旣爲吾弟子
先使識義理大分根柢旣端卽轉之農工商賈終不入大
惡定宗法十八則

楊懷遠字文來諸生讀書有疑義必究析其所以然雖儒
先不敢遽信積四十年成四書明辨錄微言大義及名物
典故皆在焉又考古限田均田制爲一書古今祭禮爲一
書又纂周禮疑五經疑諸儒源流考鄉評備考諸編家貧
常苦饑寒而一介不苟取卒金陵邸舍

重刊官廳集卷之二
儲善慶字長能穎悟絕倫年十一援筆成十藝補郡庠康熙丙午丁未聯捷成進士知井陘縣文才吏治時稱雙絕孫麟趾己未翰林

儲振字玉依生而嶷秀十一歲擬闈墨七藝提筆立就許衣庵見而奇賞之十九歲中副車康熙五年

功令初更首场用五策取士榜發方慶第一善慶第六振第八一時稱爲三鳳明年並聯雋振選庶常己酉授檢討庚戌充會試同考官是冬給假歸省時逆藩構釁振不敢甯居急束裝入都丙辰擢洗馬庚申擢右春坊庶子纂修實錄辛酉逆藩平振乃請假歸里侍養大母與其母甲子

入都

簡任日講官起居注屢承

顧問有氣度老成之獎乙丑丁內艱歸庚午服闋將赴京感微疾而終年僅四十九振至性孝友教誨諸弟最篤先是丙午臨場振晝夜讀妻許恭人親炊糲飯弟掄拾園中枯枝烹茶饑渴少充輒朗誦達旦其刻苦如此

萬樹字花農又字紅友學識明達以國子生遊都下才名籍甚然弗輕與人交客遊秦晉歸購吳氏鸚鵡園故址葺而居之繞園種綠楊名曰堆絮名其軒曰蘿隱吳大司馬興祚總督兩廣愛其才延至幕一切奏議皆出其手暇則

製曲爲新聲甫脫稿大司馬卽令家伶捧笙璫按拍高歌以侑觴所填樂府凡二十餘種又以詩餘譜舊圖多棼亂取宋元以來名家詞字櫛句比別同異辨謬譌成詞律二十卷藝林珍之歸自粵中歿於西江舟次著有堆絮園集香膽詞花農集璇璣碎錦樂府十六種左傳論文行世其詞律已採入

欽定四庫全書

徐煥龍字友雲康熙五年舉人資性超拔生平好讀書每作詩古文辭援筆而成脫稿輒任人取去鄉薦後屢困春官遂澹于仕進杜門註周易毛詩闡揚經義不受漢宋諸家牢籠所註屈辭洗髓瞭若發矇鋟版行世遠近咸珍重之

史陸輿字亦石讀書目數行下終身不忘爲文援筆立就灑灑數千言康熙十一年鄉試第一越七載捷禮闈選庶常散館改部曹補刑部主事遷員外郎遇大獄多所平反轉禮部郎中癸酉典湖南鄉試與監臨立誓于堂務遴選真才榜發果皆寒峻士甲戌差福建督學正文體振士習八閩翕然向風辛巳協理河工捐貲督役日夜罔怠閱三載河務告竣卽引歸陸輿自幼嗜學晚而彌篤於城南築室顏曰舫齋嘯歌其中晨夕披吟不倦詩古文滄茂恬雅

著有助齋詩集

周亦魯字型曾邑諸生父漣字澹芹少負文望康熙舉人亦魯承家學能文章尤以德行自勵其論學篤信考亭嘗病四書大全于朱子意未盡合乃彙文集語類諸說別成一書名曰述朱大全行世

俞景宸字文若庠生高才績學與儲同人爲文友大文在文胥受業門下屢困棘闈賣志以沒

儲欣字同人性篤學嗜經籍弱冠萃里中八俊晨夕切劘約非聖賢之書不視非其行勿繇弟君宜早世養教二孤俾成立內兄俞文若以寒卒瞻窮娶植厥嗣性和易不可

干以非義館維揚或屬黃緣事峻拒之嘗闢在陸草堂徙居夕夢盈園桃李葩絢發識者以爲公門桃李徵以故經其指授胥一時名下士擬魏科列詞垣如楊大鶴狄億暨邑中潘宗洛朱世勳從姪大文在文輩指不勝屈康熙庚午科年六十舉鄉試第四主司安邑王公激賞不已曰眞古文一上禮闈不謁貴人門惟孜孜講業模楷後學爲己任推論古文詞甚悉嘗曰由秦漢入則句不冗又曰古文極盛爲西漢爲晚唐晚唐實與西漢埒經緯集其巨擘也宋大家老泉第一盱江李泰伯力殊勝有明一代遵岩較勝近則雪苑朝宗特出筆必能飛始可語古文能走卽不

速躡跚勃窣斯爲下慈谿姜西溟亟稱之曰自南渡後此
道浸絕今得之宜興儲矣文體清真閱邃視明季尤盛後
遂衣被天下殘膏剩馥雖窮海絕徼胥爲沾丐著有在陸
草堂集唐宋十家選八家類選子芝字五采邑諸生制義
不溢先正銖黍遊其門者多獲雋從兄方慶推曰文如山
人木客約而彌達蓋得梅花芬澹之性者也乃自號梅隱
孫掌文別有傳

蔣景祁字京少永修子生而穎異質貌魁傑少長誦經史
如夙授行文洒洒數千言立就爲詩詞與同邑迦陵諸先
生相唱酬尤爲新城王阮亭所賞識屢因棘闈以歲貢生

累官府同知戊辰春赴選都門得疾居京邸惟閉戶著書
乙亥南歸營葬二親疾劇卒于家所著有東舍集五卷梧
月詞二卷春秋指掌九代說史歲寒吟燕臺唱和集諸書
謝方琦字應雲康熙三十五年舉人孝友博學善吟咏奚
蘇領邵子湘諸人稱其文辭直追史漢詩歌如峨眉積雪
閬風蒸霞李安溪欽其人品如烏中孤鳳著有東墅集
謝芳連字皆人方琦弟淹博工詩新城王阮亭擬之世尊
拈花迦葉微笑宮保蔣楊孫賦詩云王謝風流原第一至
今詞藻擅芳香康熙辛卯以薦入爲分卷纂修甲午修
欽定皇輿全覽議敘以縣職用不就 慎郡桂峯兩王以

禮邀致築名士軒居之曾贈句云翰墨橫今古烟霞是性情又云梁園遲拙才華少謝客風流姓氏香著有香祖詩庸習說風華閣儷體吟臺二子稿行世

潘旂字魯觀早歲擅文名康熙三十八年舉人選授直隸南宮縣知縣廉慎寬平不事鞭扑民便安之暇則與諸生課文藝大吏有欲列薦剡者以年力就衰却之在任三載乞休旋里杜門養疴手不釋卷卒年七十四所著有語古堂文集

陳枋字次山詩古文詞工絕一世與維崧齊名以諸生入國學年未三十卒于京師著有水榭詩稿香草亭詞子旋

事母孝工文章

儲華慶字少白廩生經義宏博騰聲江左楚浙學使聘衡文時推精鑑從叔福觀釐贖亦胥有文望後先競美焉路仍起字介繁博學能文兼工書畫慨然有經濟志嘗作莅政資言一書康熙四十二年

聖駕南巡爲頌並詩畫以獻

欽賜舉人四十八年成進士選庶常給假歸省卒于家聞者悼惜著有史學綱領訥庵詩文集等書

徐江普字舜琴少好學工詩文喜藏書書賈至輒盡舫鬻之遊儲在陸門與梅隱畫山爲文友與水榭蔣平川黃隆

吉爲詩友康熙四十四年登賢書銓注內閣中書改注知縣皆未任著有籟閣詩存稿十卷

路朝宗字海臣廩生性孝友秉資穎悟遇事勇敢有爲于經史子集無弗訂其訛謬勤加評騭年八十五猶赴南闈試例得貢未及期而卒

吳淵字玉溪國華孫少純孝父母歿哀毀淚枯砌畔海棠紅花變白著白華集弱冠補諸生工制藝尤肆力于詩南走山陰會稽北度滹沱易水覽山川之勝詩益工一時海內名士無不傾倒晚築樓城西隅顏曰遠山瞰西沱面南山日與兄滌嘯咏其上著遠山樓詩集王漁洋稱之曰清

深雅健擲地當作金聲子士棻國學生振乾歲貢生胥承庭訓工詩文

儲高文字風崇康熙四十七年第二名舉人少艱苦讀書日夜不輟卒成通儒手訂古大家文尤評騭精當子燧字敬輿亦以文名一時由進士起家官御史正直不阿

吳澍字惠侯康熙四十七年舉人時周紹濂張閻賓倡舉荆南社講學論文推澍爲祭酒後任全椒教諭子企劉字芑流天才儁上早露頭角十九游庠二十一食餼爲人翫髒豁達里中有鬻妻者捐金贖之父有遺券數百金皆不能償一炬焚之年僅二十五而卒著有西溪草堂文稿族

叔誠家貧嗜學企劉時贍給之訖爲名諸生亦早卒
盧棟隆字吉先三歲失怙奉大父母庭訓敦行篤孝研窮
經義寒暑靡間工文辭康熙五十年以五經雋北闈授山
西榆社縣知縣居官廉慎無愧祖風尋以年老乞休林居
惟書史自娛不問家計乾隆元年遇

覃恩贈父如其官

宗芝堂字秀三廩生幼穎敏弱冠詣文壇輒歷其曹於書
無不讀尤淹貫三傳下筆風發泉湧不名一體嘗手輯史
楷百二十卷藏于家

宗五雲字采三康熙五十二年舉人考取內閣中書授上

元教諭讀書日數行下與伯兄芝堂齊名時稱宗家筆任
啟運儲龍光吳端升輩咸推畏友性高澹不料量門戶篤
于孝友伯兄歿膳寡嫂撫孤姪如己出晚好佛書工詩古
文詞著有荆水釣徒集

史陳惠字典學康熙五十三年舉人博學工文教後進循
循有序孝行純篤友于兄弟兄早歿遺孤二齡教育之俾
克成人性高介不爲阿世庚戌應禮部試薦不售揭曉後
同考攜卷詣其邸欲令出門下惠拂然曰公門桃李如惠
樗材衰朽又安用爲同考慚而退凡七上公車以孝廉終
儲大文字六雅學者因所居樓稱畫山先生生而沈嘿穎

異五歲授經書神解洞開如夙契十歲隨父方慶之官清源所過阨塞險隘睥睨指顧俱有會心自清源歸受業從祖在陸偕諸兄讀書九峯樓者積十年或閉目竟日兀坐或獨往城外水涯面溪光山色徘徊忘返以故文境益遼思益奇在陸嘗稱之曰六雅坡仙化身也每應澄江白下試與江左知名士申縞紵歡時主東南壇坫者如何義門吳荆山胥推大文爲祭酒甲午應京兆試獲雋辛丑應南宮試遂甯張文端得卷朗誦曰眞法度眞才情遂魁多士授翰林庶吉士旋告病歸日坐卧畫山樓中門下士請業者遠近畢集庚戌山右撫軍石公聘修晉志銓次三百卷

有奇乾隆元年起用在籍諸臣諸公卿推大文爲海寓宿儒屢致書勸之北上迄不赴生平無他嗜好行車坐褥中手不釋卷每書買至有未見書亟置案頭窮日夜縱覽或疑其畧觀大意歷久問之無一字遺忘自諸經註疏子史百家歷代名人文集及稗官野乘旁及佛書道藏咸所綜貫尤講求實學上窮究天文下考索方輿于中國洪河巨山重關保障及邊海荒徼靡不瞭如指掌立心寬而介家有傭工竊其貲置勿問曰其人一負盜名終身莫渝矣有祖遺屋爲里豪佔賣親黨咸不平曰獨不見東坡買田事乎勿校也嘗送江甯試學使者致書餽贐堅却之邑富人

厚幣丐文爲壽輒勿許家居二十年同年舊雨爲本省大僚或手翰郵詢槩不裁覆行事類如此選古今文有玉井金梅集明文透宗集著有存研樓文上下兩集採入欽定四庫全書

儲恕字宛若歲貢生少工文蕭疎跌宕追蹤廬陵與六雅禮執任翼聖齊名金沙王耘渠罕皆咸極獎賞訓弟惠以文名著有碎金集春秋分國紀事

儲在文字禮執少敏悟年十歲家塾草經義已嶄然見頭角在陸稱之曰此玉堂器也籍校後學殖彌勤偕昆季讀書十年世傳九峰樓課藝又嘗侍在陸讀書廣陵吳氏之存園其爲文以西京劉氏東京班氏爲宗一字之成固于金湯思泉葵陽二愚大士後尠邁其格顧久困承宣試康熙四十四年恭遇

南巡獻詩引

見行幄列籍六館四十七年雋順天鄉試第二四十八年聯雋授翰林院編修籍六館時修歷代詩餘協編子史驛程卉木諸書入詞垣分纂周易折衷協修萬壽盛典乙未院試第一旋彙試西煖閣

欽定第一隨

命侍直南書房

文苑

文苑

三

賜麟袍一襲朝珠一聯是年同考禮部試雋士八人閱他
房卷雋四人四月

欽點扈蹕熱河歸邸舍內使捧黃冊數帙

命詳校

賜克食四金盃自是兼充邸教扈從金饌豹尾往返熱河
海淀者三年丁酉乞假歸假滿遂引疾不入都屢徵不起
時對兄弟啜茗清談勸課諸孫月校宗從藝業著有詩古
文詞彙二十卷名待園集

儲郁文字允焱雄文字汜雲方慶生子五人長右文次大
文次在文次郁文次雄文康熙甲午郁文與大文分雋南

北辛丑郁文雄文與大文同雋禮部試大文獲元郁文列
魁先是右文康熙丁巳登賢書在文戊子己丑聯雋同產
五人並登甲乙榜藝林傳爲盛事郁文學問邃深文章典
贍顧性不耐煩劇得第後請就教職授徽州府教授雄文
殫精詩律于中晚唐暨宋元尤深新城王公商邱宋公雅
被賞識著有浮青水榭集四卷館課古今文詩賦行世
徐瑤字天碧嗜鳳子歲貢生沈毅好學工詩古文詞經史
子集靡不研極圖與父歿後歷遊南北徧探名勝每詩文
出輒傳誦海內爲同邑陳其年儲同人崑山徐元文徐乾
學輩所推重巡撫慕天顏目爲通才所著有端齋漫稿愛

重刊宜興縣志 卷八
古堂儷體桂子樓詞行世子洪鈞亦績學工詩以明經老
有栗亭集行世

杭越字仍夏康熙五十六年經魁少工經義博通諸史百家何義門儲在陸嘆爲文止思曠之儔江左文人推爲領袖試禮部時有鉅公欲羅致門下卒不通一刺蹶禮闈遂絕意進取門下士經其指授多掇巍科者有四書闡真五經辨義映遠堂文集

吳崇字冲扶康熙三十五年舉人少從舅氏儲在陸遊超識遠趣文非檀莊列屈司馬不談或經歲不作文閒出一藝沈寥實絕在陸驚異之每日晡輒借儲畫山涉西城俯

長溪指畫洲渚颿檣相對靜默至日隱山乃歸其興致如此後館燕邸以疾卒有文集藏于家
顧洗字巽吾康熙五十六年副貢主司已定元以微疵抑置魁房考力爭之不得乃置副元文選于古深博無涯淡平生和氣謙德無遽色疾言兄弟析產受薄田後仍分潤之人稱其厚選授績溪訓導未赴卒
李荃字芝室邑廩生立身方正言動不苟行文深雅堅峭以古大家自期所著有九畹齋文集

史仲升字定遠諸生少端重醇慤刻苦自勵經學邃深尤長于禮其他子史手批盈篋文章追蹤先正師範端嚴不

少寬假門下士後先獲雋如編修朱勗爲儲寬夫孝廉儲
實夫恒夫曹敦萊輩胥克傳其學性醇篤事親事兄極孝
友兩兄相繼卒撫孤姪成立姪卒又撫其孤人以爲不負
所學云

史高統字玉垂諸生文章濬發天然輔以經籍興至操管
立就慘淡經營者訖無以過顧困于舉場中年去城居鄉
自號隱夫力啟迪後進大宗伯任公都憲徐公胥延至其
家塾課子若姪如探花任端書以及蓉湖瀨水梅里金沙
暨宜邑諸俊彥強半出門下性誠懇無城府尤爲士林所
推重

吳掄字豹臣諸生爲文辭善持論上下古今縱橫豪宕雄
視一世與同邑儲畫山任鈞臺齊名吳門何屺瞻金沙王
罕皆咸擊節稱賞其文梓于試牘者至今傳誦
萬嗣恭字繼美增生聰穎絕人工舉業屢躋棘闈益發憤
讀書思爲名山業博綜經史編輯筆數類纂三十卷晚更
潛心性理融會儒先說著四書講義
萬受采字文煥增生少遊儲在陸門與潘魯觀吳又葵郁
峻升蔣豈潛葉聖基任緯仙及在陸子五采族子六雅禮
執允浹沘雲諸名士縱橫角藝號儲門十二子而受采獨
以簡古矜貴見重于時所著文附見在陸草堂課藝中

蕭趙炎字揆三子挺字蘭穎俱諸生工文尤工詩與儲六雅汎雲蔣豈潛曹湛斯謝應雲皆人輩爲詩友每燕集分韻蕭氏父子天才穎發咸推服焉趙炎著有爨桐集挺著有友竹居詩鈔

葉肇虔字聖基諸生遊儲在陸門文見草堂課藝葉鳳翥字鳴周乾隆初以博學宏詞徵未試卒于京邸兩人俱以文學顯

毛紹義字聖穆庠生有文名好施與子時霖家貧力學工詩文書畫旁及星卜術數靡不研究所著詩文集藏於家張明善字慶之邑諸生文章書法俱有名檢身謹飭居家

儉約子大鈞字錦雲雍正元年舉人事父母以孝聞于戚黨情誼尤篤選吳縣教諭造就有法吳下士欽其師範

蔣邨字大啟允儀曾孫廩生年十三工制藝童子試冠軍嘗受業儲梅隱稱其文兼左史之清芬韓歐之灑雋年三十六卒士林惜之

陳邦榮字亦尙弱冠補諸生旋食餼幼承父訓學有本源文筆超雋晚貢成均爲邑名師生平以六行自箴故號箴六子豐垣全豐基孫疇錫銘京鎬燦文皆有聲譽序

沈牛成字元卿少好讀書父業巫屢禁其學至被箠楚終手執一編日夕吟誦遂以能文名後以歲貢補訓導熊翼

字紹周父早喪家貧母令習銀工度日有暇輒讀書問字于人後漸知作文卒爲名諸生二人皆于賤業中能自樹立者

補遺

陳貞貽字孫謀少保于廷子四歲能爲駢體十歲爲文太守歐陽公器重之補博士弟子員益攻苦屏居玉潭閣經史諸集丹鉛殆遍旁及稗官樂府尤酷嗜眉山長公文放筆千言才情浩淼江左文壇推爲主盟遭母喪哀毀骨立少保爲侍御按江右與稅璫爲難忤旨幾蹈不測貞貽驚聞嘔血寢食俱廢得疾未幾卒所著有大全性理史綱纂

評及度世當壚桃花詩謎行世吉水鄒元標題其墓曰篤行好學大儒孫謀陳子之墓

丁澄字伯澄喜植松別自號松庵博學能文邑令李公曉修邑志考核詳慎士夫稱之爲信史云

許際科字兆登邑諸生工古文辭闡發經學務得真詮有尙書影言壁經懸鏡行世尤邃易理著韋編三續一集曰訓詁家言二集談經濟大畧三集以六十四卦談戰陣法經緯變化通古名將韜略前哲湯之錡潘天成咸珍寶之徐騰蛟字德蜚博學工詩文詩得少陵氣格文亦古峭有奇致以戊子恩貢廷試上卷授內閣中書時魏栢鄉劉安

邱倡興詩會騰蛟詩一出共推白眉聲噪都下以隨征湖南功題授辰沅守道因忤直指使罷官歸著有混茫篇紀年賤諸集行世

許君建字憩園邑增生與徐汝舟屏居山寺三年學大進遊海陵館於李氏邑人詢知君建學遂爭相延請生徒日盛嘗曰冬可輟裘夏可撤帳而書不可一日廢也著有瞿職樓詩文又手錄明文自怡集三十二卷自爲之序並藏於家其古學經緯四十八卷則已散失矣
湯思孝字元祥未週而孤母秦氏授以經史克自憤勵爲高才生其儷體尤見稱於世值滄桑時所著多散失唯哭

四忠詩敘及樂府和僅存云

陳天策字銘以貢生官貴池教諭年已老矣讀書不輟與諸生講論無倦容凡佳山水無不畱詠及裁缺歸猶手抄所作詩文寄貴池人多思之

蔣如統字叔度諸生工詩同邑陳維崧撰篋衍集欲登如統詩如統謝曰吾詩抒寫性情以自適耳非可名世也終匿不與如統善書尤工行草得兄如奇筆法著有草韻墨海藏於家

宋 慕容彥逢字淑遇元祐二年進士調銅陵主簿復中詞科
 遷淮南節度推官崇甯元年除秘書省校書郎歷官刑部
 尚書卒諡文定永樂大典載所著文集二十卷外制二十
 卷內制十卷奏議五卷講解三卷其孫綸稱兵火散失訪
 得三十卷目曰摛文堂集彥逢受知徽宗列禁近官侍從
 者十五年一時典冊多出其手榮遇甚至文章雅麗制詞
 典重渾厚尤為得體今存詩二卷雜文十三卷而以諡議
 墓志銘終焉

補遺

宋

慕容彥逢字淑遇元祐二年進士調銅陵主簿復中詞科
 遷淮南節度推官崇甯元年除秘書省校書郎歷官刑部
 尚書卒諡文定永樂大典載所著文集二十卷外制二十
 卷內制十卷奏議五卷講解三卷其孫綸稱兵火散失訪
 得三十卷目曰摛文堂集彥逢受知徽宗列禁近官侍從
 者十五年一時典冊多出其手榮遇甚至文章雅麗制詞
 典重渾厚尤為得體今存詩二卷雜文十三卷而以諡議
 墓志銘終焉

馬令撰南唐書三十卷自序稱大父元康世家金陵多知南唐故事未及撰次今續先志而成之實崇甯乙酉令書規仿五代史不及陸游重修之本然創始有功且書法亦謹嚴不苟云

明

蹇曦字朝陽別自號樂正老人嘗刻倪瓚雲林詩集自序稱曾大父西溪翁至正間與同里彝齋王先生鶴溪張先生齊稱于時雲林恆往來荆溪交誼既洽題詠最多彝齋之季文靜字梅西舊藏雲林集其孫景昇近出而輯之余得覽焉不勝追歎然慮謄繕久將愈譌而廢因命工鳩梓

用壽其傳且求詞林宿學詞壇宗盟序其首而贊其末庶乎先生之名於是益著云西溪翁名原道王先生名光大張先生名監西溪翁王先生皆宜興人張先生金壇人吳完字慎庵十歲能詩鄉老有以字字命題賦詩者完卽賦七律一首應之以此馳譽十七補邑庠生中宏治乙卯鄉試文多奇古不羣旋以主試受賄事發凡記問淹博條對者悉除名完因此自廢教授終身

儲天經字思孝後巷里人教諭祖學孫少孤嗜學工詩嘗授經廣德州借州人馬叔山推詩於道爭辯甚力州牧出不及避牧召至聽事所詰之對曰推詩也牧曰若爾則二

子必晉有集令隸取至展帙喜甚遽設宴且命伶人以鼓樂導歸大書牌旗曰仙人佩劍儲思孝美女簪花馬叔山一時藝林傳爲佳話云

任珪邑諸生有詩名與杭濂輩牛首聯句盛傳都下祭酒湛若水稱其有進道之資

吳夢熊字應望萬曆丁丑進士烏程知縣性恭謹好學其仕也不究其用士論惜之

朱紱字應臣一字南涯歲貢生玉山縣學訓導同時撫軍翁公副都御史夏公相與論詩無不推重舉鄉飲大賓邑令李江稱之曰江湖興逸足跡不履乎城衢風月懷高詩

名洋溢乎遠近著有翠雲堂集行世

吳驪字惟超駭之弟力學篤行師事唐荆川先生稱高弟子達德字叔懋號西雲九歲補諸生時號神童長擅才譽從游者眾以貢生官光祿寺署正監驪如其官

任景龍字畏十篠里人諸生父元亨聚書萬卷以著述名於時景龍少承家學喜讀儒先書壯而渡錢塘踰岡嶠抵兩粵以歸所交賢士大夫如陳繼儒仲醇文震孟湛持皆倒屣相迎引爲畏友既屢試不第結廬祖塋之側顏曰依雲小築建宗祠輯宗譜教授鄉里門下多登甲乙榜者所著羣書彙攷初學一齋藏於家

路之陞副貢生廷試策問歷代配享功臣名號實蹟人俱茫然不能對之陞一一詳對遂擢第一授廣西慶遠府推官

許明鉉字君實茫溪里人諸生弱冠知名至老猶手不釋卷嘗錄漢唐以來遺事及時事之可資談論者彙爲一編名曰如鏡編凡二十四卷藏於家

國朝

黃義時字密公少卽英敏過人與同邑吳其靄清聞盧象觀幼哲蔣永修慎齋訂秋水社互相砥礪文譽大起領順治辛卯鄉薦以闡藝過奇主司稍抑後其名房師賀疎林

貽書勸慰後金壇王步青罕皆操選政亦愛重其文著有待庵文稿

黃一麟字隆古天姿英異受業同里儲欣有儲門子之目欣唐宋十家之刻一麟與其役盡心校讐以行於世暇與里中同志蔣錫震儲大文謝方琦蕭趙炎諸人詩酒歡宴競相唱和一麟詩志和音雅同人咸目爲畏友晚以恩貢當補教授不就卒

丁璣字介生大儒里人父塚有善行璣少補諸生屢試不售頗悉邑中典故凡名族世系寺觀興廢無不了然於心康熙初邑侯史宗堯創修邑志周庶子啟嵩首薦璣遂與

同里史司李夏隆等朝夕討論書垂成而罷時陳維崧尙
爲諸生璣與之擬撰荆溪外史以備邑乘之用未及成書
維崧以應

召入都璣亦以老病卒所著有帝王世譜歷代科名考藏
於家

陳維崧字半雪邑諸生貞慧仲子也好飲酒賦詩不諧於
俗一時名士多與之遊家素貧後益困惟以詩自娛著有
亦山草堂詩詩餘南曲若干卷其弟維岳字緯雲刻苦勵
學與仲兄半雪皆以詩古文詞名世一時先達如徐建庵
王阮亭朱竹垞諸人皆稱之謂可與伯兄迦陵相埒著有

秋水閣古文潘髻詩紅鹽詞諸集藏於家

曹亮武字渭公別字南耕者南耕草堂詩稿三卷南耕詞
六卷歲寒詞一卷亮武以倚聲擅名與陳維崧爲中表兄
弟當時名幾相埒其纏綿婉約之致不減維崧而才氣稍
遜云

陳維岱字石閭明順天府知事貞達子貞達死國難維岱
悲憤終身不求仕進工詩古文與從兄維崧維岳酬唱篇
什最富惜歿後全稿被女夫某持去遂致遺失先是徐推
官嗜鳳纂修縣志延維岱及潘大儒共其事商榷釐定皆
資兩人之力大儒字聖任諸生學博文工與楊湛露萬球

及族叔廷瑜廷選等爲詩相唱和咸推服之及偕徐推官修志大儒尤畱心人物多所蒐輯云

董儒龍字蓉仙父紹邦順治十二年進士官福建永安知縣以本籍奏銷案降補經歷卒儒龍幼擅文譽與同邑曹亮武南耕陳維崧其年潘眉原白爲詩文至契後以考職官貴州湄潭知縣署平遠知州以與上司不合告歸生平博極羣書著述甚富年逾七十尚日手一編不置云孫克昌國子監生官四川巫山知縣陞天泉知州以治行稱

周方石字輿瞻副貢生所學淵邃議論傾一時晚歲授桃源縣教諭嚴立課程集諸士子親切教示士風大振郡侯劉方以賢能薦而方石遽卒孫曰暘字曉山十歲誦古文未冠補諸生試輒冠軍所與游皆當時名士曰暘負雋才兼能發憤力學故於書無所不讀爲文章操筆立就著有主靜堂詩鈔存存堂文集年七十有六卒子燁亦以績學力行終其身

蔣永俶字采臣如斗次子附貢生居家孝友屢試不遇卜居城東郊築精舍疊石爲小沼植嘉樹數本顏之曰一邱一壑堆案列圖史日吟唔嘯咏其中生平所著制藝及詩歌甚夥然不自收拾隨卽散去故世罕存稿云

葉翹字培生年十八應童子試邑令王勸拔儲方慶第一

而翹第三方慶父福疇故博雅喜獎進後學見翹文嘆爲美質收之門下因與方慶兄弟及儲欣許鳳周雪周漣等結爲文社號荆南八駿晚以歲貢任當塗訓導翹爲人恬雅靜默不露圭角接之如坐春風中里有家貧粥妻者翹力止之爲捐金以周其急杙生大川當食餼而家貧不能具雜費翹資助之其每事依於厚多類此

徐璣字天玉別字畏山處士翹鳳子諸生少承家學工詩文與從兄瑤齊名一時名士多與之遊而同里諸生張霖紹傳張吉秉謙尤稱莫逆所著詩文甚多悉藏於家許泉年字涓旂弟古年字孩如俱諸生文學翎子夙承家

學資性過人嘗與中表任啟運翼聖論文古年曰行文當不斷如刀斷水水復流泉年曰不然文當句句斷譬之山脈抑揚高下無定勢或越江渡海杳不知其所之始極文章之妙啟運問古年言意慕之聞泉年言嗟嘆不及也泉年文古淡勁折閱者或不能得其句讀古年善病不甚讀書然或背誦江海諸賦盡卷不錯一字云

史元楷字幼芳卜居南郊旁臨清池老樹皆台抱前後植梅桃梧桂數本名之曰澹園中藏法書圖畫及古書數千卷與比鄰徐煥龍友筠董儒龍蓉仙投分深契風晨月夕時劇談于茗椀筆牀間而詩詞唱和尤多意外驚人語所

著詩古文詞一帙嗣子崧哀集之屬友人瞿源洙爲之傳云

潘良瑜字毓珍父英偕從兄旂受業儲在陸爲名諸生良瑜幼學於父刻苦進取於儒先理學靡不究尤好兩漢文丹黃至數十過與從弟方林以通經學古相砥礪一時聲應者爲張閔賓沈禹采字茹范觀水周宸錫機少皆推爲領袖以困死所遺古文集三卷聞見編六卷皆所善陳魯瞻手訂藏於家子學錫聰穎絕人爲文有法度亦早世吳文斗字雲澗六科圩里人諸生性沈靜言動必以聖賢爲師健戶手執一編足不入城市爲文高古渾厚識者擬

之明王濟之歸熙甫然終困於諸生以卒

范度字轉東幼孤貧絕意治生自讀書爲文作書外他無所好以貧老嘗爲笠亭銘自言其志尙甚悉所著古文多散失書法以古拙勝多作小行書冊其大幅尤蒼勁同時周彥亦工書蜀山東坡書院及附近祠廟榜書多出其手宋士班字培元一字花顛布衣工詩楊鳳臺序其詩云先生之詩本之性情而發揮眾妙合於天地自然之和間有踈縱豪宕亦出入於蘇陸之間長孫爲章亦善書工詩有祖風

史逢年字荆澱附貢生善屬文爲同邑儲在陸高弟尤長

重刊正學集卷八
於詩風格明麗兼擅樊川玉溪之勝著有漏湖詩草其友
儲在文編修序之孫元穎字映川別自號奕園邑諸生承
大父訓亦工詩遊京兆屢試不售晚歲以詩自娛訓子弟
勤學砥行以敦睦爲務一時學者宗之咸稱爲奕園先生
云著有秋樹軒詩集行世
張鍾岳舉人康熙五十四年應禮部試時新例九卿科道
會同考試列優等選上海縣學教諭端方式士諸生以詩
文就正者無閔遠近後丁艱解任僑居上海杜門不出惟
高足馬文標等以文藝相質云
潘祖義字行廉眉子廩貢生少與兄本仁及弟秉禮受業

儲同人俱以工制舉藝名邑中祖義性喜爲詩尤善填詞
得南宋諸家之長同邑蔣景祁京少選刻瑤華集常延之
考訂焉次子巖字履謙廩生文學有名

徐寬字時介國子監生幼卽奇慧工文長益喜讀書嚴寒
盛暑手一編不輟夜有所疑不能待旦篝燈辨明之然後
已家藏書數厨評點殆盡手錄古書幾倍於所藏雖家計
中落不問也與儲在陸爲鄰交最善而從兄珪美尤相契
合無閒言每樽酒相呼輒說經論文窮日夜不倦

陳履端字求夏一字晚耘維崧嗣子少擅雋才爲文瞻麗
有家風郡守于延修府志入都偕王阮亭姜西溟諸父執

